



岑嘉州集卷上

長安鄭
振錄也
請子也

明長洲許自昌玄祐甫校

五言古詩

送許子擢第歸江寧拜親因寄王大昌齡

建業控京口金陵欵滄溟君家臨秦淮傍對石頭
城十年自勤學一鼓遊上京青春登甲科動地聞
香名解榻皆五侯結交盡羣英六月槐花飛忽思
尊萊羹跨馬出國門丹陽返柴荆楚雲引歸帆淮
水浮客程到家拜親時入門有光榮鄉人盡來賀



置酒相邀迎閑眺北顧樓醉眠湖上亭月從海門
出照見茅山青昔爲帝王州今幸天下平五朝變
人世千載空江聲玄元告靈符丹洞獲其銘皇帝
受玉冊羣臣羅天庭喜氣薄太陽祥光徹宵冥奔
走朝萬國崩騰集百靈王兄尙謫官屢見秋雲生
孤城帶後湖心與湖水清一縣無諍辭有時開道
經黃鶴垂兩翅徘徊但悲鳴相思不可見空望牛
女星

武威送劉單判官赴安西行營使呈高開

文獻通考

熱海巨鐵門火山赫金方白草磨天涯胡沙奔茫
茫夫子佐戎幕其鋒利如霜中歲學兵符不能守
文章功業須及時立身有行藏男兒感忠義萬里
忘越鄉孟夏邊候遲胡國草木長馬疾過飛鳥天
窮超夕陽都護新出師五月發軍裝甲兵二百萬
錯落黃金光揚旗拂崑崙伐鼓震蒲昌太白引官
軍天威臨大荒西望雲侶蛇戎夷知喪亡渾驅大
宛馬繫取樓蘭王曾到交河城風土斷人腸塞驛

遠如點邊烽互相望赤亭多飄風鼓怒不可當有
時無人行沙石亂飄揚夜靜天簫條鬼哭夾道傷
地上多髑髏皆是古戰場置酒高館夕邊城月蒼
蒼軍中宰肥牛堂上羅羽觴紅淚金燭盤嬌歌豔
新粧望君仰青冥短翮難可翔蒼然西郊道握手
何慨慷

送王大昌齡赴江寧

對酒寂不語悵然悲送君明時未得用白首徒攻
文澤國從一官滄波幾千里羣公滿天闕獨去過

淮水舊家富春渚嘗憶臥江樓自聞君欲行頗望
南徐州窮巷獨閉門寒燈靜深屋北風吹微雪抱
被肯同宿君行到京口正是堯花時舟中饒孤興
湖上多新詩潛虬且深蟠黃鶴飛來晚惜君青雲
器努力加餐飯

送祁樂歸河東

祁樂後來秀挺身出河東往年詣驪山獻賦溫泉
宮天子不召見揮鞭遂從戎前月還長安囊中金
已空有時忽乘輿畫出江上峯牀頭蒼梧雲簾下

天台松忽如高堂上颯颯生清風五月火雲屯氣
燒天地紅鳥且不敢飛子行如轉蓬少華與首陽
隔河勢爭雄新月河上出清光滿關中置酒灞亭
別高歌披心胷君到故山時爲謝五老翁

北庭貽宗學士道別

萬事不可料歎君在軍中讀書破萬卷何事來從
戎曾逐李輕車西征出太蒙荷戈月窟外擇甲崑
崙東兩度皆破胡朝廷輕戰功十年祇一命萬里
如飄蓬容鬢老胡塵衣裘脆邊風忽來輪臺下相

見披心胷飲酒對春草彈碁聞夜鐘今日還龜茲
臂上懸角弓平沙向旅館匹馬隨飛鴻孤城倚大
磧海氣迎邊空四月猶自寒天山雪濛濛君有賢
主將何謂泣塗窮時來整六翮一舉凌蒼穹

送許拾遺恩歸江寧拜親

詔書下青瑣駟馬還吳洲東帛仍賜衣恩波漲滄
流微祿將及親向家非遠遊看君五斗米不謝萬
戶侯適出西掖垣如到南徐州歸心望海日鄉夢
登江樓大江盤金陵諸山橫石頭楓樹隱茅屋橘

林繫漁舟種藥疏故畦釣魚垂舊鈎對月京口夕
觀濤海門秋天子憐諫官論事不肯休早來丹墀
下高駕無淹留

虢州郡齋南池幽興因與閻二侍御道別
池色淨天碧水涼雨淒淒快風從東南荷葉翻向
西性本愛魚鳥未能返巖谿中歲狗微官遂令心
賞睽及茲佐山郡不異尋幽棲小吏趨竹徑訟庭
侵藥畦胡塵暗河洛二陝震鼓鼙故人佐戎軒逸
翮凌雲霓行軍在函谷兩度聞鶯啼相看紅旗下

飲酒白日低聞君欲朝天駟馬臨道嘶仰望浮與
沈忽如雲與泥夜眠驛樓月曉發關城雞惆悵西
郊暮鄉書對君題

送青龍招提歸一上人遠遊吳楚別詩

久交應真侶最歎青龍僧棄官向二年削髮歸一
乘了然瑩心身潔念樂空寂名香泛窻戶幽磬清
曉夕往年杖一劔由是佐二庭於焉久從戎兼復
解論兵世人猶未知天子願相見朝從青蓮宇暮
入白虎殿宮女檠錫杖御筵出香爐說法開藏經

論邊窮陣圖忘機厭塵喧浪迹向江海思師石可
訪惠遠峰猶在今旦飛錫去何時持鉢還湖煙冷
吳門淮月銜楚山一身如浮雲萬里過江水相思
眇天外南望無窮已

送李翥遊江外

相識應十載見君只一官家貧祿尚薄霜降衣仍
單惆悵秋草死蕭條方歲闌且尋滄洲路遙指吳
雲端匹馬關塞遠孤舟江海寬夜眠楚煙濕曉飯
湖山寒砧淨紅鱸落袖香朱橘團帆前見禹廟枕
底聞嚴灘便獲賞心趣豈歌行路難青門須醉別
少爲解征鞍

送王著作赴淮西幕府

燕子與百勞一西復一東天空信寥廓翔集何時
同知己悵難遇良朋非易逢憐君心相親與我家
又通言笑日無度書劄凡幾封湛湛萬頃陂森森
千丈松不知有機巧無事干心胸滿堂皆酒徒豈
復羨王公早年抱將略累歲依幕中昨者從淮西
歸來奏邊功乘恩長樂殿醉出明光宮逆旅悲寒

蟬客夢驚飛鴻發家見春草却去聞秋風月色冷
楚城淮光透霜空各自務功業當須激深衷別後
能相思何嗟山萬重

送張秘書充劉相公通汴河判官便赴江

外覲省

前年見君時見君正泥蟠去年見君處見君已風
搏朝趨赤墀前高視青雲端新登麒麟閣適脫解
豸冠劉公領舟楫汴水揚波瀾萬里江海通九州
天地寬昨夜動使星今日送征鞍老親在吳郡令

第雙同官鱸膾剩堪憶尊羹殊可餐既參幕中畫
復展膝下驪因送故人行試歌行路難何處路最
難最難在長安長安多權貴珂珮聲珊珊儒生直
如絃權貴不須干斗酒取一醉孤琴爲君彈臨岐
欲有贈持以握中蘭

冬宵家會餞李郎司兵赴同州

急管雜青絲玉瓶金屈卮寒天高堂夜撲地飛雪
時賀君關西掾新綬腰下垂白面皇家郎逸翮青
雲姿明旦之官去他辰良會稀惜別冬夜短務歡

杯行遲季女猶自小老夫未令歸且看匹馬行不
得鳴鳳飛昔歲到馮翊人煙接京師曾上月樓頭
遙見面嶽祠沙苑逼官舍蓮峰壓城池多暇或自
公讀書復彈棊州縣信徒勞雲霄亦可期應須力
爲政聊慰此相思

送顏平原

併序

十二年春有詔補尚書十數公爲郡守上親賦詩
觴羣公宴于蓬萊前殿仍錫以繒帛寵餞加等參
美顏公是行爲寵別章句

天子念黎庶詔書換諸侯仙郎授剖符華省輟分
憂置酒會前殿賜錢若山丘天章降三光聖澤該
九州吾兄鎮河朔拜命宣皇猷馱駟馬辭國門一星
東北流夏雲照銀印暑雨隨行輶赤筆仍在篋鑪
香惹衣裘此地鄰東溟孤城弔滄洲海風掣金戟
導吏呼鳴騶郊原北連燕剽劫風未休魚鹽隘里
巷桑柘盈田疇爲郡豈淹旬政成應未秋易俗去
猛虎化人侶馴鷗蒼生已望君黃霸寧久留

送狄員外巡按西山軍

兵馬守西山中國非得計不知何代策空使蜀人
弊八州崖谷深千里雲雪閉泉澆閣道滑水凍繩
橋脆戰士常苦饑糗糧不相繼胡兵猶不歸空山
積年歲儒生識損益言事皆審諦狄子幕府郎有
謀必康濟宵中懸明鏡照耀無巨細莫辭冒險艱
可以裨節制相思江樓夕愁見月澄霽

虢州送鄭興宗第歸扶風別廬

佐郡已三載豈能長後時出關少親友賴汝常相
隨今日且忽言別愴然俱淚垂半生滄洲意獨有青

山知州縣不敢說雲霄誰敢期因懷東溪老最憶
南峰緇我爲多種藥還山應未遲

澧頭送蔣侯

君住澧水北我家澧水西兩村辨喬木五里聞鳴
雞飲酒溪雨過彈碁山月低徒開蔣生徑爾去誰
相攜

送永壽王贊府遙歸縣

當官接閒暇暫得歸林泉百里路不宿兩鄉山復
連夜深露濕簾月出風驚蟬且盡主人酒爲君從

醉眠

潼關鎮國軍勾覆使院早春寄王同州
胡寇尚未盡大軍鎮關門旌旗遍草木兵馬如雲
屯聖朝正用武諸將皆承恩不見征戰功但聞歌
吹喧儒生有長策閉口不敢言昨從關東來思與
故人論何爲廊廟器至今居外藩黃霸寧淹留蒼
生望騰騫卷簾見西岳仙掌明朝暎昨夜聞春風
戴勝過後園各自限官守何由叙涼溫離憂不可
忘襟背思樹萱

青山峽口泊舟懷狄侍御

峽口秋水壯沙邊且停橈奔濤振石壁峰勢如動
搖九月蘆花新彌令客心焦誰念在江島故人滿
天朝無處豁心育憂來醉能銷往來巴山道三見
秋草彫狄生新相知才調凌雲霄賦詩拆造化入
幕生風飈把筆判甲兵戰士不敢驕皆云梁公後
遇鼎還能調離別倏經時音塵殊寂寥何當見夫
子不歎鄉關遙

寄青城龍溪真道人

五嶽之丈人西望青曹曹雲開露崖嶠百里見石
稜龍溪盤中峯上有蓮華僧絕頂小蘭若四時嵐
氣疑身同雲虛無心與谿清澄誦戒龍每聽賦詩
人則稱杉風吹袈裟石壁懸孤燈久欲謝微祿誓
將歸大乘願聞開士說庶以心相應

梁州對雨懷麴二秀才便呈麴大判官時

疾贈余新詩

江上雲氣黑岬山昨夜雷水惡平明飛雨從嶠冢
來濛濛隨風過蕭颯鳴庭槐隔簾濕衣巾當暑涼

幽齋麴生住相近言語阻且乖臥疾不見人午時
門始開終日看本草藥苗滿前堦兄弟早有名甲
科皆秀才二人事慈母不弱古老萊昨歎携手遲
未盡平生懷愛君有佳句一日吟幾回

潼關使院懷王七季友

王生今才人時輩咸所仰何當見顏色終日勞夢
想驅車到關下欲往阻河廣滿目徒春華思君罷
心賞開門見太華朝日映高掌忽覺蓮花峰別來
更如長無心顧微祿有意在獨往不負林中期終

當出塵經

至大梁却寄匡城主人

一從棄魚釣十載干明王無由謁天階却欲歸滄
浪仲秋至東郡遂見天雨霜昨夜夢故山蕙草色
已黃平明辭鐵丘薄暮遊大梁仲秋蕭條景拔刺
飛鵝鷓四郊陰氣閉萬里無晶光長風吹白茅野
火燒枯桑故人南燕吏籍籍名更香聊以玉壺贈
置之君子堂

宿華陰東郭客舍憶關防

次舍山郭近解鞍鳴鍾時主人炊新粒行子充夜
饑關月生首陽照見華陰祠蒼茫秋山晦蕭瑟寒
松悲久從園廬別遂與朋知辭舊壑蘭杜晚歸軒
今已遲

春遇南使貽趙知音

端居春心醉襟背思樹萱美人在南州爲爾歌北
門北風吹煙物戴勝鳴中園枯楊長新條芳草滋
舊根網絲結寶琴塵埃被空樽適遇江海信聊與
南客論

郊行寄杜位

嶮嶮空城煙淒清寒山景秋風引歸夢昨夜到汝
頴近寺聞鍾聲映陂見樹影所思何由見東北徒
引領

懷葉縣關操姚曠韓涉李叔齊

數子皆故人一時吏宛葉經年總不見書札徒滿
篋斜日半空庭旋風走梨葉去君千里地言笑何
時接

大舍山初至西號官舍南池呈左右省及南宮諸

故人

黜官自西掖待罪臨下陽空積犬馬戀豈思鴛鴦
行素多江湖意偶佐山水鄉滿院池月靜卷簾溪
雨涼軒牕竹翠濕案牘荷花香白鳥上衣桁青苔
生筆牀數公不可見一別盡相忘敢恨青瑣客無
情華省郎早年迷進退晚節悟行藏他日能相訪
嵩南舊草堂

宿東谿懷王屋李隱者

山店不鑿井百家同一泉晚來南村黑雨色和人

煙霜畦吐寒菜沙鴈噪河田隱者不可見天壇飛
鳥邊

聞崔十二侍御灌口夜宿報恩寺

聞君尋野寺便宿支公房溪月冷深殿江雲擁回
廊燃燈松林靜煮茗柴門香勝事不可接相思幽
興長

敬酬杜華淇上見贈兼呈熊曜

杜侯實才子盛名不可及祗曾効一官今已年四
十是君同時者已有尚書郎憐君獨未遇淹泊在

他鄉我從京師來到此喜相見共論窮途事不覺
淚滿面憶昨癸未歲吾兄自江東得君江湖詩骨
氣凌謝公熊生尉淇上開館常待客喜我二人來
歡笑朝復夕縣樓壓春岸戴勝鳴花枝吾徒在舟
中縱酒兼彈碁三月猶未還客愁滿春草賴蒙瑤
華贈諷詠慰懷抱

酬成少尹駱谷行見呈

聞君行路難惆悵臨長衢豈不憚險艱王程剩相
拘憶昨蓬萊宮新授刺史符明主仍賜衣價直千

萬餘何幸承命日得與夫子俱携手出華省連鑣
赴長途五馬當路嘶按節投蜀都千崖信縈折一
徑何盤紆層冰滑征輪密竹礙隼旟深林迷昏旦
棧道凌空虛飛雪縮馬毛烈風擘我膚峯攢望天
小亭午見日初夜宿月近人朝行雲滿車泉澆石
罅折火入松心枯亞尹同心者風流賢大夫榮祿
上及親之官隨板輿高價振臺閣清詞出應徐成
都春酒香且用俸錢沽浮名何足道海上堪乘桴

號中酬陝西甄判官贈

微才棄散地拙宦慙清時白髮徒自負青雲難可
期胡塵暗東洛亞相方出師分陝振鼓鼙二嶠滿
旌旗夫子廊廟器迥然青冥姿闔外佐戎律幕中
吐兵奇前者驛使來忽在行軍詩畫吟庭花落夜
諷山月移昔君隱蘇門浪跡不可羈詔書自徵用
令譽天下知別來春草長東望轉相思寂寞山城
暮空聞畫角悲

過梁州奉贈張尚書大夫公

漢中二良將今昔各一時韓信此登壇尚書復來

斯手把銅虎符身總文人師錯落北斗星照耀黑
水湄英雄若神授大材濟時危頃歲遇雷雲精神
感靈祇勲業振青史恩德繼鴻私羗虜昔未平華
陽積僵屍人煙絕墟落鬼火依城池巴漢空水流
袞斜惟鳥飛自公布德政此地生光輝百堵創里
閭千家恤惇發層城重鼓角甲士如熊羆坐嘯風
自調行春雨仍隨芄芄麥苗長藹藹桑葉肥浮客
相與來羣盜不敢窺何幸承嘉惠小年卽相知富
貴情易踈相逢心不移置酒宴高館嬌歌雜青絲

錦席繡拂廬玉盤金屈卮春景透高戟江雲篔簹長
麾櫪馬嘶柳陰美人映花枝門傳大夫印世擁上
將旗承家令名揚許國苦節施戎幕寧久駐台階
不應遲別有彈冠士希君無見遺

冀州客舍酒酣貽王綺寄題南樓

夫子傲常調詔書下徵求知君欲謁帝抹馬趨西
周逸足何駸駸美聲實風流富學瞻清詞下筆不
能休君家一何盛赫奕難爲儔伯父四五人同時
爲諸侯憶昨始相值值君客具丘相看復乘興攜

手到冀州前日在南縣與君上北樓野曠不見山
白日落草頭客舍梨花繁深花隱鳴鳩南隣新酒
熟有女彈空篋醉後或狂歌酒醒滿離憂主人不
相識此地難淹留吾廬終南下堪與王孫遊何當
肯相尋灑上一孤舟

北庭西郊侯封大夫受降回軍獻上

胡地首着美輪臺征馬肥大夫討匈奴前月西出
師甲兵未得戰降虜來如歸橐駝何連連穹帳亦
纍纍陰山烽火滅劔水羽書稀却笑霍嫖姚區區

徒爾爲西郊侯中軍平沙懸落暉驛馬從而來雙
節夾路馳喜鵲捧金印蛟龍盤畫旗如公未四十
富貴能及時直上排青雲傷看疾若飛前年斬樓
蘭去歲平月支天子日殊寵朝廷方見推何幸一
書生忽蒙國士知側身佐戎幕斂衽事邊陲自逐
定遠侯亦着短後衣近來能走馬不弱并州兒

使交河郡

奉使按胡俗平明發輪臺暮投交河城火山赤崔
嵬九月尚流汗炎風吹沙埃何事陰陽工不遣兩

雪來吾君方憂邊分闔資大才昨者新破胡安西
兵馬回鐵關控天崖萬里何遼哉煙塵不敢飛白
草空皚皚軍中日無事醉舞傾金壘漢代李將軍
微功今可咍
秋夜宿仙遊寺南涼堂呈謙道人
太一連太白兩山知幾重路盤石門窄匹馬行才
通日西到山寺林下逢支公昨夜山北時星星聞
此鐘秦文去已久仙臺在中峯簫聲不可聞此地
留遺蹤石潭積黛色每歲投金龍亂流爭迅湍噴

薄如雷風夜來聞清磬月出蒼山空空山滿清光
水樹相玲瓏回廊映密竹秋殿隱深松燈影落前
溪夜宿水聲中愛茲林巒好結宇向溪東相識唯
山僧鄰家一釣翁林晚栗初折枝寒梨已紅物幽
興易愜事勝趣彌濃願謝區中緣永依金人宮寄
報乘輦客簪裾爾何容

上嘉州青衣山中峯題惠淨上人幽居寄

兵部楊郎中 并序

青衣之山在大江之中屹然迥絕崖壁蒼峭周廣

七里長波四匝有惠淨上人廬于其巔唯繩牀竹
杖而已恒持蓮華經十年不下山予自公浮舟聊
一登眺友人夏官弘農楊侯清談之士也素工爲
文獨立于世與予有方外之約每多獨徃之意今
者幽躅勝槩歎不得與此公俱爰命小吏刮磨石
壁以識其事乃詩之達揚友爾

青衣誰開鑿獨在水中央浮舟一躋攀側逕沿穹
蒼絕頂訪老僧豁然登上方諸嶺一何小三江奔
茫茫蘭若向西開峨眉正相當猿鳥樂鍾磬松蘿

泛天香江雲入袈裟山月吐繩牀早知清淨理久
巧機心忘尚以名宦拘聿來夷獠鄉吾友不可見
鬱爲尚書郎早歲愛丹經留心向青囊渺渺雲智
遠幽幽海懷長勝賞欲與俱引領遙相望爲政愧
無術分憂幸時康君子滿天朝老夫憶滄浪況值
廬山遠抽簪歸法王

自潘陵尖還少室居止秋夕憑眺

草堂近少室夜靜聞風松月出潘陵尖照見十六
峯九月山葉赤溪雲淡秋容火點伊陽村煙深嵩

角鐘尚子不可見蔣生難再逢勝愜只自知佳趣
爲誰濃昨詣山僧期上到天壇東向下望雷雨雲
間見回龍夕與人羣踈轉愛丘壑中心淡水木會
興幽魚鳥通稀微了自釋出處乃不同况本無宦
情誓將依道風

陪狄員外早秋登府西樓因呈院中諸公
常愛張儀樓西山正相當千峯帶積雪百里臨城
墻煙氛掃晴空草樹映朝光車馬隘百井里閉盤
二江亞相自登壇時危安此方威聲振蠻貊惠化

鍾萃陽旌節羅廣庭戈鋌凜秋霜階下貔虎士幕
中鴛鷺行今我忽登臨顧恩不望鄉知己猶未報
鬢毛颯已蒼時命難自知功業豈暫忘蟬鳴秋城
夕鳥去江天長兵馬休戰爭風塵尙蒼茫誰當共
攜手賴有冬官郎

登嘉州凌雲寺作

寺出飛鳥外青峰戴朱樓搏壁躋半空喜得登上
頭始知宇宙闊下看三江流天晴見峨眉如向波
上浮迥曠煙景豁陰森棕栴稠願割區中緣永從

塵外遊回風吹虎穴片雨當龍湫僧房雲濛濛夏
月寒颼颼回合俯近郭廖落見遠舟勝槩無端倪
天宮可淹留一官詎足道欲去令人愁

與高適薛據同登慈恩寺

塔勢如湧出孤高聳天宮登臨出世界磴道盤虛
空突兀壓神州崢嶸如鬼工四角礙白日七層摩
蒼穹下窺指高鳥俯聽聞驚風連山若波濤奔湊
似朝東青槐夾馳道宮館何玲瓏秋色從西來蒼
然滿關中五陵北原上萬古青濛濛淨理了可悟
勝因夙所宗誓將挂冠去覺道資無窮

登北庭北樓呈幕中諸公

嘗讀西域傳漢家得輪臺古塞千年空陰山獨崔
嵬二庭近西海六月秋風來日暮上北樓殺氣凝
不開大荒無鳥飛但見白龍堆舊國眇天末歸心
日悠哉上將新破胡西郊絕煙埃邊城寂無事撫
劒空徘徊幸得趨幕中託身厠羣才早知安邊計
未盡平生懷

登千福寺楚金禪師法華院多寶塔

多寶滅已久蓮華付吾師寶塔凌太空忽如湧出
時數年功不成一志堅自持明主親夢見世人今
始知千家獻黃金萬匠磨琉璃既空泰山木亦罄
天府貲焚香如雲屯幡蓋珊珊垂悉宰神繞護衆
魔不敢窺作禮覩靈境焚香方證疑庶割區中緣
脫身恒在茲

出關經華嶽寺訪法華雲公

野寺聊解鞍偶見法華僧開門對西嶽石壁青稜
層竹逕厚蒼苔松門盤紫籐長廊列古畫高殿懸
孤燈五月山雨熱三峰火雲蒸側聞樵人言深谷
猶積冰久願尋此山至今嗟未能謫官忽東走王
程苦相仍欲去戀雙樹何由窮一乘月輪吐山郭
夜色空清澄

宿太白東溪李老舍寄弟姪

渭上秋雨過北風何騷騷天晴諸山出太白峰最
高上人東溪老兩耳生長毫遠近知百歲子孫皆
二毛中庭井欄上一架獼猴菴石泉飯香粳酒甕
開新糟愛茲田中趣始悟世上勞我行有勝事書

此寄爾曹

潭石淙望秦嶺微雨作貽友人

昨夜雲際宿旦從西峰回不見林中僧微雨潭上來諸峯皆青翠秦嶺獨不開石鼓有時鳴秦王安在哉東南雲開處突兀獼猴臺崖口懸瀑流半空白皚皚噴壁四時雨傍村終日雷北瞻長安道日夕多塵埃若訪張仲蔚衡門滿蒿萊

南池夜宿思王屋青蘿舊齋

池上臥煩暑不櫛復不巾有時清風來自謂羲皇

人天晴雲歸盡雨洗月色新公事常不閒道書日生塵早年家王屋五別青蘿春安得還舊山東溪垂釣綸

題率巖寺瓌公禪房

寺南幾十峰峰翠晴可掬朝從老僧飯昨日崖口宿錫杖倚枯松繩牀映深竹東溪草堂路來往行自熟生事在雲山誰能復羈束

峨眉東脚臨江聽猿懷二室舊廬

峨眉煙翠新昨夜秋雨洗分明峰頭樹倒插秋江

底久別二室間圖他五斗米哀猿不可聽北客欲
流涕

春半與羣公同遊元處士別業

郭南處士宅門外羅羣峰勝槩忽相引春華今正
濃山厨竹裏爨野碓藤間春對酒雲數片卷簾花
萬重巖泉嗟到晚州縣欲歸慵草色帶朝雨灘聲
兼夜鍾愛茲清俗慮何事老塵容况有林下約轉
懷方外蹤

陪羣公龍岡寺泛舟

漢水天一色寺樓波底看鐘鳴長空夕月出孤舟
寒映酒見山火隔簾聞夜灘紫鱗掣芳餌紅燭燃
金盤良友興正愜勝遊情未闌此中堪倒載須盡
主人歡

終南雙峰草堂

斂跡歸山田息心謝時輩書還草堂臥但見雙峰
對興來資佳遊事愜符勝槩著書高牕下日夕見
城內曩爲世人誤遂負平生愛久與林壑辭及來
杉松大偶茲精廬近數預名僧會有時逐樵漁盡

日不冠帶崖口上新月石門破蒼靄色向羣木深
光搖一潭碎緬懷鄭生谷頗憶嚴子瀨勝事猶可
追斯人邈千載

東歸留題太常徐卿草堂

不謝古名將吾知徐太常年纔三十餘勇冠西南
方頃曾策匹馬獨出持兩鎗虜騎無數來見君不
敢當漢將小衛霍蜀將凌關張卿月益清澄將星
轉光芒復居少城北遙對岷山陽車馬日盈門賓
客常滿堂曲池蔭高樹小徑穿叢篁江鳥飛入簾

山雲來到牀題詩芭蕉滑對酒棕花香諸將射獵
時君在翰墨場聖主賞勲業邊城最輝光與我情
綢繆相知久芬芳忽作萬里別東歸三峽長

過王判官西津所居

勝迹不在遠愛君池館幽素懷巖中諾宛得塵外
遊何必到清溪忽來見滄洲潛移岷山石暗引巴
江流樹密晝先夜竹深夏已秋沙鳥上筆牀谿花
簞簾鈎夫子賤簪冕注心向林丘落日出公堂垂
綸乘釣舟賦詩憶楚老載酒隨江鷗翛然一傲吏

獨在西津頭

因假歸白閣西草堂

雷聲傍太白雨在八九峰東望白閣雲半入紫閣
松勝槩紛滿目衡門趣彌濃幸有數畝田得延二
仲蹤早聞達士語偶與心相通悞徇一微官還山
愧塵容釣竿不復把野碓無人春惆悵飛鳥盡南
溪聞夜鐘

太一石鼈崖口潭舊廬招王學士

驟雨鳴浙瀝颼颼溪谷寒碧潭千餘尺下見蛟龍

蟠石門吞衆流絕岸呀層巒幽趣倏萬變奇觀非
一端偶逐千祿徒十年皆小官抱板尋舊圃弊廬
臨迅湍君子滿清朝小人思掛冠釀酒澆松子引
泉通竹竿何必濯滄浪不能釣巖灘此地可遺老
勸君來考槃

林臥

偶得魚鳥趣復茲水木涼遠峰帶雨色落日搖川
光曰中西山藥袖裏淮南方唯愛隱几時獨遊無
何鄉

左僕射相國冀公東齋幽居

丞相百僚長兩朝居此官成公雲雷際翊聖天地
安不矜南宮貴祗向山東看宅占鳳城勝窻中雲
嶺寬午時松軒夕六月藤齋寒玉珮胄女蘿金印
耀牡丹山蟬上衣桁野鼠緣藥盤有時披道書竟
日不着冠幸得趨省闈常欣在門闌何當復持衡
短翮期風搏

過緱山王處士黑石谷隱居

舊居緱山下偏識緱山雲處士久不還見雲如見

君別來逾十秋兵馬日紛紛青溪開戰場黑谷屯
行軍遂令巢由輩遠逐麋鹿群獨有南澗水潺湲
如昔聞

緱山西峰草堂作

結廬對中嶽青翠常在門遂耽水木興盡作漁樵
言頃來闕章句但欲閒心魂日色隱空谷蟬聲喧
暮村曩聞道士語偶見清淨源隱几閱吹葉乘秋
眊歸根獨遊念求仲開徑招王孫片雨下南澗孤
峰出東原棲遲慮益澹脫略道彌敦野靄晴拂枕

客帆遙入軒尚平今何在此意誰與論佇立雲去
盡蒼蒼月開園
觀楚國寺璋上人寫一切經院南有曲池
深竹
璋公不出院羣木閉深居誓寫一切經欲向萬卷
餘揮毫散林鵲研墨警池魚音翻四句偈字譯五
天書鳴鐘竹陰晚汲水桐花初雨氣潤衣鉢香煙
泛庭除此地日清淨諸天應來如不知將錫杖早
晚躡空虛

尋鞏縣南李處士別業

先生近南郭茅屋臨東川桑葉隱村戶蘆花映釣
船有時著書暇盡日窻中眠且喜間井近灌田同
一泉

驪姬墓

驪姬北原上閉骨已千秋澮水日東注惡名終不
流獻公恣耽惑視子如仇讎此事成蔓草我來逢
古丘娥眉山月落蟬鬢野雲愁欲弔二公子橫汾
無輕舟

東歸晚次潼關懷古

暮春別鄉樹晚景低津樓伯夷在首陽欲往無輕
舟遂登關城望下見洪河流自從巨靈開流血千
萬秋行行潘生賦赫赫曹公謀川上多往事淒涼
滿空洲

楚夕旅泊古興

獨鶴淚江月孤帆凌楚雲秋風冷蕭瑟蘆荻花紛
紜忽思湘川老欲訪雲中君麒麟息悲鳴愁見豺
虎羣

先主武侯廟

先主與武侯相逢雲雷際感通君臣分義激魚水
契遺廟空蕭然英靈貫千歲

文公講臺

文公不可見空使蜀人傳講席何時散高臺豈復
全豐碑文字滅冥冥不知年

楊雄草玄臺

吾悲子雲居寂寞人已去娟娟西江月猶照草玄
處精怪意無人睢盱藏老樹

司馬相如琴臺

相如琴臺古人去臺亦空臺上寒蕭條至今多悲
風荒臺漢時月色與舊時同

嚴君平卜肆

君平曾賣卜卜肆蕪已久至今杖頭錢時時地上
有不知支機石還在人間否

張儀樓

傳是秦時樓巍巍至今在樓南兩江水千古長不
改曾聞昔時人歲月不相待

昇僊橋

長橋題柱去猶是未達時及乘駟馬車却從橋上
歸名共東流水滔滔無盡期

萬里橋

成都與維陽相去萬里地滄江東流疾帆去如鳥
翅楚客過此橋東看盡垂淚

石犀

江水初蕩瀟蜀人幾爲魚向無爾石犀安得有邑
居始知李太守伯禹亦不如

龍女何處來來時乘風雨祠堂青林下宛宛如相
語蜀人競祈恩捧酒仍擊鼓

南池宴餞辛子賦得科斗子

臨池見科斗羨爾樂有餘不憂經與釣辛得免爲
魚且願充文字登君尺素書

初過隴山途中呈宇文判官

一驛過一驛驛騎如星流平明發咸陽暮到隴山
頭隴水不可聽嗚咽令人愁沙塵撲馬汗霧露凝

貂裘西來誰家子自道新封侯前月發安西路上
無停留都護猶未到來時在西州十日過沙磧終
朝風不休馬走碎石中四蹄皆血流萬里奉王事
一身無所求也知塞垣苦豈爲妻子謀山口月欲
出先照關城樓谿流與松風靜夜相颼颼別家賴
歸夢山寨多離憂與子且攜手不愁前路修

東歸發犍爲至泥溪舟中作

前日解侯印泛舟歸山東平旦發犍爲逍遙信回
風七月江水大滄波漲秋空復有峨眉僧誦經在

舟中夜泊防虎豹朝行逼魚龍一道鳴迅湍兩邊
走連峰猿拂岸花落鳥啼巖樹重煙靄吳楚連泝
沿湖海通憶昨在西掖復曾入南宮日出朝聖人
端笏陪羣公不意今棄置何由豁心胷吾當海上
去且學乘桴翁

與鮮于庶子自梓州成都少尹自褒城同
行至利州道中作

剖竹向西蜀岷峨眇天涯空深北闕戀豈憚南路
賒前日登七盤曠然見三巴漢水出嶓冢梁山控

褒斜棧道籠迅湍行人貫層崖巖傾劣通馬石窄
難容車深林怯魍魅洞穴防龍蛇水種新插秧山
田正燒畚夜猿嘯山雨曙鳥鳴江花過午方始飯
經時旋及瓜數公各遊宦千里皆辭家言笑忘羈
旅還如在京華

下外江舟中懷終南舊居

杉冷曉猿悲楚客心欲絕孤舟巴山雨萬里陽臺
月水宿已淹時蘆花白如雪顏容老難赭把鏡悲
鬢髮早年好金丹方士傳口訣弊廬終南下久與

真侶別道書誰更開藥竈煙遂滅頃來厭塵經安
得有仙骨巖壑歸去來公卿是何物

安西館中思長安

家在日出處朝來起東風風從帝鄉來不異家信
通絕域地欲盡孤城天遂窮彌年但走馬終日隨
飄蓬寂寞不得意辛勤方在公胡塵淨古塞兵氣
宅邊空鄉路眇天外歸期如夢中遙憑長房術爲
縮天山東

暮秋山行

疲馬臥長坂夕陽下通津山風吹空林颯颯如有
人蒼旻霽涼雨石路無飛塵千念集暮節萬籟悲
蕭辰鶗鴂昨夜鳴蕙草色已陳况在遠行客自然
多苦辛

赴犍爲經龍閣道

側徑搏青壁危梁透滄波汗流出鳥道膽碎窺龍
渦驟雨暗溪谷歸雲縵松蘿屢聞羌兒笛厭聽巴
童歌江路險復永夢魂愁更多聖朝幸典郡不敢
嫌岷峨

江上阻風雨

江上風欲來泊舟未能發氣昏雨未過突兀山復
出積浪成高丘盤渦爲軟窟雲低岸花掩水漲灘
草沒老樹虵蛻皮崩崖龍退骨平生抱忠信艱險
殊可忽

經火山

火山今始見突兀蒲昌東赤焰燒虜雲炎氛蒸塞
空不知陰陽炭何獨燃此中我來嚴冬時山下多
炎風人馬盡汗流孰知造化功

題鐵門關樓

鐵關天西涯極目少行客關門一小吏終日對石
壁橋跨千仞危路盤兩岸窄試登西樓望一望頭
欲白

早上五盤嶺

平旦驅駟馬曠然出五盤江回兩岸鬪日隱羣峰
攢蒼翠煙景曙森沈雲樹寒松疎露孤驛花密藏
回灘棧道溪雨滑畚田原草乾此行爲知已不覺
蜀道難

入劔門作寄杜楊二郎中時二公並爲杜
元帥判官

不知造化初此山誰開拆雙崖倚天立萬仞從地
劈雲飛不到頂鳥去難過壁速駕畏巖傾單行愁
路窄平明地仍黑停午日暫赤凜凜三伏寒巉巉
五丁迹與時忽開閉負固或順逆磅礴跨岷峨魏
蟠限蠻貊星當觜參分地處西南僻斗覺煙景殊
杳將華夏隔劉氏昔顛覆公孫曾敗績始知德不
修恃此險何益相公總師旅遠近罷金革杜母來

何遲蜀人應更惜暫回丹青慮少用開濟策二友
華省郎俱爲幕中客良籌佐戎律精理皆碩畫高
文出詩騷奧學窮討贖聖朝無外戶寰宇被德澤
四海今一家徒然劔門石

阻戎瀘間羣盜

南州林莽深凶命聚其間殺人無昏曉屍積填江
灣餓虎銜髑髏饑鳥啄心肝腥衰灘草死血流江
水殷夜雨風蕭蕭鬼哭連楚山三江行人絕萬里
無征船唯有白鳥飛空見秋月圓罷官自南蜀假

道來茲川瞻望陽臺雲惆悵不敢前帝鄉北近日
瀘口南連蠻何當遇長房縮地到京關願得隨琴
高騎魚向雲煙明主每憂人節使恒在邊兵革方
禦寇爾惡胡不悛吾竊悲爾徒此生安得全

西蜀旅舍春歎寄朝中故人呈狄評事

春與人相乖柳青頭轉白生平未得意覽鏡心自
惜四海猶未安一身無所適自從兵戈動遂覺天
地窄功業悲後時光陰歎虛擲却爲文章累幸有
開濟策何負當途人心無矜窘厄回瞻後來者皆

欲肆轡轢起草思南宮寄言憶西掖時危任舒卷
身退知損益窮巷草轉深閒門日將夕橋西暮雨
黑籬外春江碧昨者初識君相看俱是客聲華同
道術世業通往昔早須歸天階不得安孔席吾先
稅歸鞅舊國如咫尺

行軍二首

吾竊悲此生四十幸未老一朝逢世亂終日不自
保胡兵奪長安宮殿生野草傷心五陵樹不見二
京道我皇在行軍兵馬日浩浩胡雛尚未滅諸將

本嘉州集 卷上
三
懇征討昨聞咸陽敗殺戮淨如掃積屍若丘山流
血漲豐鎬干戈礙鄉國豺虎滿城堡村落皆無人
簫條空桑棗儒生有長策無處豁懷抱塊然傷時
人舉首哭蒼昊

早知逢世亂少小謾讀書悔不學彎弓向東射狂
胡偶從諫官列謬向丹墀趨未能匡吾君虛作一
丈夫撫劍傷世路哀歌泣良圖功業今已遲覽鏡
悲白鬚平生抱忠義不敢私微軀

郡齋閑坐

負郭無良田屈身狗微祿平生好踈曠何事就羈
束幸曾趨丹墀數得侍黃屋故人盡榮寵誰念此
幽獨州縣非宿心雲山忻滿目頃來廢章句終日
披案牘佐郡竟何成自悲徒碌碌

鞏北秋興寄崔明允

白露披梧桐玄蟬晝夜號秋風萬里動日暮黃雲
高君子佐休明小人事逢蒿所適在魚鳥焉能狗
錐刀孤舟向廣武一鳥歸成臯勝槩日相與思君
心鬱陶

世事何反覆一身難可料頭白翻折腰歸家還自
笑所嗟無產業妻子嫌不調五斗米留人東溪憶
垂釣

尹相公京兆府中棠樹降甘露詩

相府尹京兆政成人不欺甘露降府庭上天表無
私非無他人家豈少羣木枝披茲甘露樹美掩召
伯詩團團甜如密晶晶凝若脂千柯玉光碎萬葉
珠顆垂崑崙何時來慶雲相逐飛魏宮銅盤貯漢

帝金掌持王澤布人和精心動靈祇君臣日同德
禎瑞方潛施何術令大臣感通能及茲忽驚政化
理暗與神物期却笑趙張輩徒稱今古稀為君下
天酒麴蘖將用時

劉相公中書江山畫帳

相府徵墨妙揮毫天地窮始知丹青筆能奪造化
功瀟湘在簾間廬壑橫坐中忽疑鳳凰池暗與江
海通粉白湖上雲黛青天際峯晝日恒見月孤帆
如有風巖花不飛落澗草無春冬擔錫香爐緇釣

岑嘉州集 卷上
魚滄浪翁如何平津意尚想塵外蹤富貴心獨輕
山林與彌濃喧幽趣頗異出處事不同請君爲蒼
生未可追赤松

秋夕聽羅山人彈三峽流泉

皤皤岷山老抱琴鬢蒼然衫袖拂玉徽爲彈三峽
泉此曲彈未半高堂如空山石林何颼颼忽在窻
戶間繞指弄嗚咽青絲激潺湲演漾怨楚雲虛徐
韻秋煙疑兼陽臺雨似雜巫山猿幽引鬼神聽淨
令耳目便楚客腸欲斷湘妃淚斑斑誰栽青桐枝

桓以朱絲絃能含古人曲邇與今人傳知音難再
逢惜君方老年曲終月已落惆悵東齋眠

精衛

負劍出北門乘桴適東溟一鳥海上飛云是帝女
靈玉顏溺水死精衛空爲名怨積徒有志力微竟
不成西山木石盡巨壑何時平

石上籐

石上生孤籐弱蔓依石長不逢高枝引未得凌空
上何處堪託身爲君長萬丈

七言古詩

青門歌送東臺張判官

青門金鎖平旦開城頭日出使車回青門柳枝正
堪折路傍一日幾人別東出青門路不窮驛樓官
樹灞陵東花撲征衣看似繡雲隨去馬色疑駘胡
姬酒壚日未午絲繩玉缸酒如乳灞頭落花沒馬
蹄昨夜微雨花成泥黃鸝翅濕飛屢低關東尺書
醉懶題須臾望君不可見揚鞭飛鞚疾於箭借問
使乎何時來莫作東飛百勞西飛燕

梁園歌送河南王說判官

君不見梁孝王修竹園頽墻隱赫勢仍存嬌蛾慢
臉成草蔓羅帷珠簾空竹根大梁一旦人代改秋
月春風不相待池中幾度鴈新來洲上千年鶴應
在梁園二月梨花飛却似梁王雪下時當時置酒
延枚叟肯料平臺狐兔走萬事翻覆如浮雲昔人
空在今人口單父古來稱處生祗今爲政有吾兄
韜軒若過梁園道應傍琴臺聞政聲

白雪歌送武判官歸京

北風卷地白草折胡天八月卽飛雪忽如一夜春
風來千樹萬樹梨花開散入珠簾濕羅幕狐裘不
暖錦衾薄將軍角弓不得控都護鐵衣冷難着瀚
海闌干百丈冰愁雲慘淡萬里凝中軍置酒飲歸
客胡琴琵琶與羌笛紛紛暮雪下韓門風掣紅旗
凍不翻輪臺東門送君去去時雪滿天山路山回
路轉不見君雪上空留馬行處

熱海行送崔侍御還京

側聞陰中胡兒語西頭熱海水如煮海上衆鳥不

敢飛中有鯉魚長且肥岸傍青草常不歇空中白
雪遙旋滅蒸沙爍石燃虜雲沸浪炎波煎漢月陰
火潛燒天地爐何事偏烘西一隅勢吞月窟侵太
白氣連赤坂通單于送君一醉天山郭正見夕陽
海邊落栢臺霜威寒逼人熱海炎氣爲之薄

走馬川行奉出師西征

君不見走馬川行雪海邊平沙莽莽黃入天輪臺
九月風夜吼一川碎石大如斗隨風滿地石亂走
匈奴草黃馬正肥金山西見煙塵飛漢家大將西

出師將軍金甲夜不脫半夜軍行戈相撥風頭如
刀面如割馬毛帶雪汗氣蒸五花連錢旋作冰幕
中草檄硯水凝虜騎聞之應膽懾料知短兵不敢
接車師西門佇獻捷

輪臺歌奉送封大夫出師西征

輪臺城頭夜吹角輪臺城北旄頭落羽書昨夜過
渠黎單于已在金山西戍樓西望煙塵黑漢兵屯
在輪臺北上將擁旄西出征平明吹笛大軍行四
邊伐鼓雪海湧三軍大呼陰山動虜塞兵氣連雲
屯戰場白骨纏草根劒河風急雲片闊沙口石凍
馬蹄脫亞相勤王甘苦辛誓將報土靜邊塵古來
青史誰不見今見功名勝古人

敷水歌送竇漸入京

羅敷昔時秦氏女千載無人空處所昔時流水至
今流萬事皆逐東流去此水東流無盡期水聲還
似舊來時岸花仍自羞紅臉堤柳猶能學翠眉春
去秋來不相待水中月色長不改羅敷養蠶空耳
聞使君五馬今何在九月霜天水正寒故人西去

度征鞍水底鯉魚幸無數願君別後垂尺素
函谷關歌送劉評事使關西
君不見函谷關崩城毀壁至今在樹根草蔓遮古
道空谷千年長不改寂寞無人空舊山聖朝無事
不須關白馬公孫何處去青牛老人更不還蒼苔
白骨空滿地月與古時長相似野花不省見行人
山鳥何曾識關吏故人方乘使者車吾知郭丹却
不如請君時憶關外客行到關西多致書

天山雪歌送蕭治歸京

天山雪雲常不閉千峰萬嶺雪崔嵬北風夜卷赤
亭口一夜天山雪更厚能兼漢月照銀山復逐胡
風過鐵關交河城邊鳥飛絕輪臺路上馬蹄滑
靄寒氛萬里凝闌干陰崖千丈冰將軍狐裘臥不
暖都護寶刀凍欲斷正是天山雪下時送君走馬
歸京師雪中何以贈君別惟有青青松樹枝

胡笳歌送顏真卿使赴河隴

君不聞胡笳聲最悲紫髯綠眼胡人吹吹之一曲
猶未了愁殺樓蘭征戍兒涼秋八月蕭關道北風

本嘉州集 卷上
吹斷天山草崑崙山南月欲斜胡人向月吹胡笳
胡笳怨兮將送君秦山遙望隴山雲邊城夜夜多
愁夢向月胡笳誰喜聞

火山雲歌送別

火山突兀赤亭口火山五月火雲厚火雲滿山疑
未開飛鳥千里不敢來平明乍逐胡風斷薄暮渾
隨塞雨回繚繞斜吞鐵關樹氛氲半掩交河戍迢
迢征路火山東山上孤雲隨馬去

天山雲秦箏歌送外生蕭正歸京

汝不聞秦箏聲最苦五色纏絃十三柱怨調慢聲
如欲語一曲未終日移午紅亭水木不知暑忽彈
黃鍾和白紵清風颯來雲不去聞之酒醒淚如雨
汝歸秦兮彈秦聲秦聲悲兮聊送汝

與獨孤漸道別長句兼呈嚴八侍御

輪臺客舍春草滿潁陽歸客腸堪斷窮荒絕漠鳥
不飛萬積千山夢猶懶憐君白面一書生讀書千
卷未成名五侯貴門脚不到數畝山田身自耕與
來浪跡無遠近及至辭家憶鄉信無事垂鞭信馬

本嘉州集 卷一
頭西南幾欲窮天盡奉使三年獨未歸邊頭詞客
舊來稀借問君來得幾日到家不覺換春衣高齋
清晝卷羅幕紗帽接離慵不着中酒朝眠日色高
彈棊夜半燈花落米片高堆金錯盤滿堂凜凜五
月寒桂林蒲桃新吐蔓武城刺密未可餐軍中置
酒夜撾鼓錦筵紅燭月未午花門將軍善胡歌葉
河蕃王能漢語知爾園林壓渭濱夫人堂上泣羅
裙魚龍川北盤溪雨鳥鼠山西洮水雲臺中嚴公
於我厚別後新詩滿人口自憐棄置天西頭因君

爲問相思否

送郭又雜言

地上青草出經冬今始歸博陵無近信猶未換春
衣憐汝不忍別送汝上酒樓初行莫早發且宿灞
橋頭功名須及早歲月莫虛擲早年已工詩近日
兼注易何時過東洛早晚渡盟津朝歌城邊柳驪
地邯鄲道上花撲人去年四月初我正在河朔曾
上君家縣北樓樓上分明見恒嶽中山明府待君
來須計行程及早回到家速覓長安使待汝書封

我自開

送費子歸武昌

漢陽歸客悲秋草
旅舍葉飛愁不掃
秋來倍憶武昌魚
夢着只在巴陵道
曾隨上將過祁連
離家十年恒在邊
劔鋒可惜虛用盡
馬蹄無事今已穿
知君開館常愛客
樽蒲百金每一擲
平生有錢將與人
江上故園空四壁
吾觀費子毛骨奇
廣眉大口仍赤髭
看君失路尚如此
人生貴賤那得知
高秋八月歸南楚
東門一壺聊出祖
路指鳳凰山北雲

衣沾鸚鵡洲邊雨
勿歎蹉跎白髮新
應須守道勿羞貧
男兒何必戀妻子
莫向江村老却人

送魏升卿擢第歸東都因懷魏校書陸渾

喬潭

井上桐葉雨灑亭
卷秋風故人適戰勝
匹馬歸山東問君
今年三十幾能使香名
滿人耳君不見三峰直上
五千仞見君文章亦如此
如君兄弟天下稀
雄詞健筆皆若飛
將軍金印鞞紫綬
御史鐵冠重繡衣
喬生作尉別來久
因君爲問平安否
魏侯

校理復何如前日人來不得書陸渾山水佳可賞
逢閣閒時日應往自料青雲未有期誰知白髮偏
能長壚頭青絲白玉瓶別時相顧酒如傾搖鞭舉
袂忽不見千樹萬樹空蟬鳴

送張獻心充副使歸河西雜句

將門子弟君獨賢一從受命常在邊末年三十已
高位腰間金印色赭然前日承恩白虎殿歸來見
者誰不羨篋中賜衣十重餘案上軍書十二卷看
君謀智若有神愛君詞句皆清新澄湖萬頃深見

底清冰一片光照人雲中昨夜使星動西門驛樓
出相送玉瓶素蟻臘酒香金鞍白馬紫遊韉花門
南燕支北張掖城頭積雲黑送君一去天外憶

送魏四落第還鄉

東歸不稱意客舍戴勝鳴臘酒飲未盡春衫縫已
成長安柳枝春欲來洛陽梨花在前開魏侯池館
今尚在猶有太師歌舞臺君家盛德豈徒然時人
注意在吾賢莫令別後無佳句祇向壚頭空醉眠

送韓巽入都覲省便赴舉

槐葉蒼蒼柳葉黃秋高八月天欲霜青門百壺送
韓侯白雲千里連嵩丘北堂倚門望君憶東歸扇
枕後秋色洛陽才子能幾人明年桂枝是君得

送李副使赴磧西官軍

火山六月應更熱赤亭道口行人絕知君慣度祁
連城豈能愁見輪臺月脫鞍暫入酒家壚送君萬
里西擊胡功名祇向馬上取真是英雄一丈夫

送宇文南金放後歸太原寓居因呈太原

郝主簿

歸去不得意北京關路賒却投晉山老愁見汾陰
花翻作灞陵客憐君丞相家夜眠旅舍雨曉醉春
城鴉送君繫馬青門口胡姬壚頭勸君酒為問太
原賢主人春來更有新詩否

西亭子送李司馬

高高亭子郡城西直上千尺與雲齊盤崖綠壁試
攀躋羣山向下飛鳥低使君五馬天半嘶絲繩玉
壺為君提坐來一望無端倪紅花綠柳鶯亂啼千
家萬井連回溪酒行未醉聞暮雞點筆操紙為君

題爲君題惜解攜草萋萋沒馬蹄

臨河客舍呈狄明府兄留題縣南樓

鳳陽城南雪正飛
黎陽渡頭人未歸
河邊酒家堪寄宿
主人小女能縫衣
故人高臥黎陽縣
一別三年不相見
邑中雨雪偏着時
隔河東郡人遙羨
鄴都唯見古時丘
漳水還如舊日流
城上望鄉應不見
朝來好是懶登樓

寄西嶽山人李岡

君隱處當一星蓮花峰
頭飯黃精仙人掌上演丹

經鳥可到人莫攀
隱來十年不下山
袖中短書誰爲達
華陰道士賣藥還

玉門關蓋將軍歌

蓋將軍真丈夫
行年三十執金吾
身長七尺頗有鬚
玉門關城迥且孤
黃沙萬里白草枯
南鄰犬戎北接胡
將軍到來備不虞
五千甲兵膽力麤
軍中無事但歡娛
暖屋繡簾紅地爐
織成壁衣花氍毹
燈前侍婢瀉玉壺
金鐙亂點野酡酥
紫綬金章左右趨
問着卽是蒼頭奴
美人一雙閒且都
朱唇翠

眉映明眸清歌一曲世所無今日喜聞鳳將雛可
憐絕勝秦羅敷使君五馬謾踟躕野草繡窠紫羅
襦紅牙鏤馬對檇蒲玉盤纖手撒作盧衆中跨道
不曾輸櫪上昂昂皆駿駒桃花叱撥價最殊騎將
獵向城南隅臘日射殺千年狐我來塞外按邊儲
爲君取醉酒剝沽醉爭酒盞相喧呼忽憶咸陽舊
酒徒

贈酒泉韓太守

太守有能政遙聞如古人俸錢盡供客家計亦清

貧酒泉西望玉關道千山萬磧皆白草辭君卷馬
歸長安隱居倏忽令人老

偃師東與韓樽同詣景雲暉上人卽事

山陰老僧解楞伽潁陽歸客遠相過煙深草濕昨
夜雨雨後秋風渡漕河空山終日塵事少平郊遠
見行人小尚書磧上黃昏鐘別駕渡頭一歸鳥

漁父

扁舟滄浪叟心與滄浪清不自道鄉里無人知姓
名朝從灘上飯暮向蘆中宿歌竟還復歌手持一

竿竹竿頭釣絲長
文餘鼓拽乘流無定居
世人那得識深意
此翁取適非取魚

醉題匡城周少府壁

婦姑城南風雨秋
婦姑城中人獨愁
愁雲遮却望鄉處
數日不上西南樓
故人薄暮公事閒
玉壺美酒琥珀殷
潁陽秋草今黃盡
醉臥君家猶未還

燉煌太守後庭歌

燉煌太守才且賢
郡中無事高枕眠
太守到來山出泉
黃沙磧裏人種田
燉煌老舊鬢皓然
願留太

守更五年城頭月出星滿天
曲房置酒張錦筵
美人紅粧色正鮮
倒垂高髻插金鈿
醉坐藏鉤紅燭前
不知鈎在若箇邊
爲君手把珊瑚鞭
射得半段黃金錢
此中樂事亦已偏

梁州館中與諸判官夜集

彎彎月出掛城頭
城頭月出照梁州
梁州七里十萬家
胡人半解彈琵琶
琵琶一曲腸堪斷
風簫簫兮夜漫漫
河西幕中多故人
故人別來三五春花
樓門前見秋草
豈能貧賤相看老
一生大笑能幾

回斗酒相逢須醉倒
喜韓樽相過

三月灞陵春已老故人相逢耐醉倒
甕頭春酒黃
花脂祿米只充沽酒資
長安城中足年少
獨共韓侯開口笑
桃花點地紅班班
有酒留君且莫還與
君兄弟日攜手
世上虛名好是閒

酒泉太守席上醉後作

琵琶長笛曲相和
羌兒胡雛齊唱歌
渾炙犁牛烹野駝
交河美酒歸叵羅
三更醉後軍中寢
無奈秦

山歸夢何

登古鄴城

下馬登鄴城
城空復何見
東風吹野火
暮入飛雲殿
城隅南對望陵臺
漳水東流不復回
武帝官中人去盡
年年春色爲誰來

銀山磧西館

銀山峽口風似箭
鐵門關西月如練
雙雙愁淚沾馬毛
颯颯胡沙迸人面
丈夫三十未富貴
安能終日守筆硯

邶鄆客舍歌

客從長安來驅馬邶鄆道傷心叢臺下一旦生蔓
草客舍門臨漳水邊垂楊下繫釣魚船邶鄆女兒
夜沽酒對客挑燈誇數錢酩酊醉時日正午一曲
狂歌壚上眠

宿蒲關東店憶杜陵別業

關門鎖歸路一夜夢還家月落河上曉遙聞秦樹
鴉長安二月歸正好杜陵樹邊純是花

感遇二首

五花驄馬七香車云是平陽帝子家鳳凰城頭日
欲斜門前高樹鳴春鴉漢家魯元君不聞今作城
西一古墳昔來唯有秦王女獨自吹簫乘白雲
北來有芳杜靡靡花正發未及得採之秋風忽吹
殺君不見拂雲百丈青松柯縱使秋風無柰何四
時常作青黛色可憐杜花不相識

客舍悲秋有懷兩省舊遊呈幕中諸公

三度爲郎便白頭一從出守五經秋莫言聖主長
不用其那蒼生應未休人間歲月如流水客舍秋

本嘉州集 卷上
風今又起不知心事向誰論江上蟬鳴空滿耳

衛節度赤驃馬歌

君家赤驃畫不得一團旋風飛花色紅纓紫韁珊
瑚鞭玉鞍錦鞵黃金勒請君鞞出看君騎尾長宰
地如紅絲自矜諸馬皆不及却憶百金新買時香
街紫陌鳳城內滿城見者誰不愛揚鞭驟急白汗
流弄影行驕碧蹄碎紫髯胡雛金剪刀平明翦出
三駿高櫪上看時獨意氣衆中牽出偏雄豪騎將
獵向南山口城南狐兔不復有草頭一點疾如飛

卻使蒼鷹翻向後憶昨看君朝未央鳴珂擁蓋滿
路香始知邊將真富貴可憐人馬相輝光男兒稱
意得如此駿馬長鳴北風起待君東去掃胡塵爲
君一日行千里

田使君美人如蓮花北鋌歌

美人舞如蓮花旋世人有眼應未見高臺滿地紅
氍毹試舞一曲天下無此曲胡人傳入漢諸客見
之驚且嘆慢臉嬌蛾纖復穠輕羅金鏤花葱籠回
裾轉袖若飛雪左鋌右鋌生旋風琵琶橫笛和未

岑嘉州集 卷上
匝花門山頭黃雲合忽作出塞入塞聲白草胡沙
寒颯颯翻身入破如有神前見後見回回新始知
諸曲不可比採蓮落梅徒聒耳世人學舞祇是舞
姿態豈能得如此

裴將軍宅蘆管歌

遼東九月蘆葉斷遼東小兒採蘆管可憐新管清
且悲一曲風飄海頭滿海樹蕭索天雨霜管聲寥
亮月蒼蒼白狼河北堪愁恨玄兔城南皆斷腸遼
東將軍長安宅美人蘆管會佳客弄調啾飀勝洞

簫發聲窈窕欺橫笛夜半高堂客未回祇將蘆管
送君盃巧能陌上驚楊柳復向園中誤落梅諸客
愛之聽未足高捲珠簾列紅燭將軍醉舞不肯休
更使美人吹一曲

太白胡僧歌

并序

太白中峰絕頂有胡僧不知幾百歲眉長數寸身
不製繒帛衣以草葉恒持楞伽經雲壁迥絕人迹
罕到嘗東峰有鬪虎弱者將死僧杖而解之西湫
有毒龍久而爲患僧器而貯之商山趙叟前年採

茯苓深入太白偶值此僧訪我而說予恒有獨往
之意聞而悅之乃爲歌曰
聞有胡僧在太白蘭若去天三百尺一持楞伽入
中峰世人難見但聞鐘牕邊錫杖解兩虎牀下鉢
盂藏一龍草衣不針復不線兩耳垂肩眉覆面此
僧年幾那得知手種青松今十圍心將流水同清
淨身與浮雲無是非商山老人已曾識願一見之
何由得山中有僧人不識城裏看山空黛色

范公叢竹歌

并序

簫發聲窈窕欺橫笛夜半高堂客未回祇將蘆管
送君盃巧能陌上驚楊柳復向園中誤落梅諸客
愛之聽未足高捲珠簾列紅燭將軍醉舞不肯休
更使美人吹一曲

太白胡僧歌

并序

太白中峰絕頂有胡僧不知幾百歲眉長數寸身
不製繒帛衣以草葉恒持楞伽經雲壁迥絕人迹
罕到嘗東峰有關虎弱者將死僧杖而解之西湫
有毒龍久而爲患僧器而貯之商山趙叟前年採

茯苓深入太白偶值此僧訪我而說予恒有獨往
之意聞而悅之乃爲歌曰
聞有胡僧在太白蘭若去天三百尺一持楞伽入
中峰世人難見但聞鐘牕邊錫杖解兩虎牀下鉢
盂藏一龍草衣不針復不線兩耳垂肩眉覆面此
僧年幾那得知手種青松今十圍心將流水同清
淨身與浮雲無是非商山老人已曾識願一見之
何由得山中有僧人不識城裏看山空黛色

范公叢竹歌

并序

職方郎中兼侍御史范公乃於陝西使院內種竹
新製叢竹詩以見示美范公之清致雅操遂爲歌
以和之

世人見竹不解愛知君種竹府庭內此君託根幸
得地種來幾時聞已大盛暑脩脩叢色寒間宵槭
槭葉聲乾能清案牘簾下見宜對琴書牕外看爲
君成陰將蔽日迸筍穿階踏還出守節偏凌御史
霜虛心願比郎官筆君莫愛南山松樹枝竹色四
時也不移寒天草木黃落盡猶自青青君始知

優鉢羅花歌 并序

參嘗讀佛經聞有優鉢羅花目所未見天寶庫申
歲參忝大理評事攝監察御史領伊西北庭度支
副使自公多暇乃於府庭內栽樹種藥爲山鑿地
婆娑乎其間足以寄傲交河小吏有獻此花者云
得之於天山之南其狀異於衆草勢籠從如冠弁
巖然上聳生不傍引攢花中折駢葉外包異香騰
風秀色媚景因賞而嘆曰爾不生於中土僻在遐
裔使牡丹價重芙蓉譽高惜哉夫天地無私陰陽

無偏各遂其生自物厥性豈以偏地而不生乎豈
以無人而不芳乎適此花不遭小吏終委諸山谷
亦何異懷才之士未會明主擯於林藪耶因感而
爲歌歌曰

白山南赤山北其間有花人不識綠莖碧葉好顏
色葉六瓣花九房夜掩朝開多異香何不生彼中
國今生西方移根在庭媚我公堂耻與衆草之爲
伍何亭亭而獨芳何不爲人之所賞兮深山窮谷
委嚴霜吾竊悲陽關道路長曾不得獻于君王

韋員外家花樹歌

今年花似去年好，去年人到今年老。始知人老不如花，可惜落花君莫掃。君家兄弟不可當，列卿御史尚書郎。朝回花底恒會客，花撲玉缸春酒香。

蜀葵花歌

昨日一花開，今日一花開。今日花正好，昨日花已老。人生不得恒少年，莫惜牀頭沽酒錢。請君有錢向酒家，君不見蜀葵花。

醉後戲與趙歌兒

秦州歌兒歌調苦，偏能立唱濮陽女。座中醉客不得意，聞之一聲淚如雨。向使逢着漢帝憐，董賢氣咽不能語。

題李士曹廳壁畫度雨雲歌

似出棟梁裏，如和風雨飛。掾曹有時不敢歸，謂言雨過濕人衣。

岑嘉州集卷上 不花樹歌

似去年好去年人到今年始知人老不

惜落花君在掃掃君來死與

無人空自花似曾客化世

飲李中丞

不飲語

意聞之

無他烟景烟歸苦

岑嘉州集卷下

明長洲許自昌玄祐甫校

五言律詩

南樓送衛憑

近縣多過客似君誠亦稀南樓取涼好便送故人

歸鳥向望中滅雨侵晴處飛應須乘月去且為解

征衣

送王伯倫應制授正字歸

當年最稱意數子不如君戰勝時偏許名高人共

聞半天城北雨斜日灞西雲科斗皆成字無令錯
古文

送宇文舍人出宰元城

雙鳧出未央千里過河陽馬帶新行色衣聞舊御
香縣花迎墨綬關柳拂銅章別後能爲政相思淇
水長

崔駙馬山池重送宇文明府

竹裏過紅橋花間籍綠苗池涼醒別酒山翠拂行
鑣鳳去粧樓閉鳧飛葉縣遙不逢秦女在何處聽

吹簫

送李郎尉武康

潘郎腰綬新雪上縣花春山色低官舍湖光映吏
人不須嫌邑小莫卽耻家貧更作東征賦知君有
老親

磧西頭送李判官入京

一身從遠使萬里向安西漢月垂鄉淚胡沙費馬
蹄尋河愁地盡過磧覺天低送子軍中飲家書醉
裏題

陪使君早春西亭送王贊府赴選

西亭繫五馬爲送故人歸
客舍草新出關門花欲
飛到來逢歲酒却去換
春衣吏部應相待如君
才調稀

送劉郎將歸河東

借問虎賁將從軍
凡幾年殺人寶刀缺
走馬貂裘穿山雨醒
別酒關雲迎渡船
謝君賢主將豈忘輪
臺邊

澹水東店送唐子歸嵩陽

野店臨官路重城壓御堤
山開灞水北雨過杜陵
西歸夢秋能作鄉書醉
懶題橋回忽不見征馬
尚聞嘶

西亭送蔣侍御還京

忽聞驄馬至喜見故人來
欲語多時別先愁計日
回山河宜晚眺雲霧待
君開爲報烏臺客須憐
白髮催

水亭送劉顥使還歸節度

無計留君住應須絆馬蹄
紅亭莫惜醉白日眼看

本嘉州集 卷一
三
低解帶憐高柳移牀愛小溪此來相見少政事各
東西

送楊錄事充使

夫子方寸裏清秋澄霽江關西望第一郡內政無
雙狹室下珠箔連宵傾玉缸使乎仍未醉斜月隱
吟窻

送裴判官自賊中再歸河陽幕府

東郊未解圍忠義似君稀誤落胡塵裏能持漢節
歸卷簾山對酒上馬雪沾衣却向嫖姚幕翩翩去

若飛

送陝縣王主簿赴襄陽成親

六月襄山道三星漢水邊求凰應不遠去馬騰須
鞭野店愁中雨江城夢裏蟬襄陽多故事爲我訪
先賢

送李卿賦得孤島石

一片他山石巉巖映小池綠窠攢剝蘚尖碩坐鷗
鷁水底看常到花邊勢欲欹君心能不轉卿月豈
相離

送王錄事卻歸華陰王錄事自華陰尉授
虢州錄事參軍旬日卻復舊官

相送欲狂歌其如此別何攀轅人共惜解印日無
多仙掌雲重見關門路再過雙魚莫不寄縣外是
黃河

送二十二兄北遊尋羅中

斗柄欲東指吾兄方北遊無媒謁明主失計干諸
侯夜雪入穿履朝霜凝敝裘遙知客舍飲醉裏聞
春鳩

送鄭堪歸東京汜水別業

客舍見春草忽聞思舊山看君灞陵去匹馬成臯
還對酒風與雪向家河復關因悲宦遊子終歲無
時間

送崔全被放歸都觀省

夫子不自衒世人知者稀來傾阮氏酒去着老萊
衣渭北草新出關東花欲飛楚王猶自惑宋玉且
將歸

送孟孺卿落第歸濟陽

獻賦頭欲白還家衣已穿羞過灞陵樹歸種汶陽
田客舍少鄉信牀頭無酒錢聖朝徒側席濟上獨
遺賢

送裴校書從大夫淄川覲省

尚書東出守愛子向青州一路通關樹孤城近海
樓懷中江橘熟倚處戟門秋更奉輕軒去知君無
客愁

送楊千牛赴歲赴汝南郡覲省便成親

問吉轉征鞍安仁道姓潘歸期明主賜別酒故人

歡珠箔障爐暖狐裘耐臘寒汝南遙倚望早去及
春盤

送胡象落第歸王屋別業

看君尚年少不第莫悽然可即被獻賦山村歸種
田野花迎短褐河柳拂長鞭置酒聊相送青門一
醉眠

送顏韶

遷客猶未老聖朝今復歸一從襄陽住幾度梨花
飛世事了可見憐君人亦稀相逢貪醉卧未得作

春衣

送杜佐下第歸陸渾別業

正月今欲半陸渾花未開出關見青草春色正東
來夫子且歸去明時方愛才還須及秋賦莫即隱
蒿萊

送張郎中赴隴右覲省鄉公

中郎鳳一毛世上獨賢豪弱冠已銀印出身唯寶
刀還家鄉月迴度隴將星高幕下多相識邊書醉
懶操

送楚丘麴少府赴官

青袍美少年黃綬一神仙微子城東面梁王苑北
邊垂花色似馬榆莢小於錢單父聞相近家書早
爲傳

送蜀郡李椽

飲酒俱未醉一言聊贈君功曹善爲政明王還應
聞夜宿劔門月朝行巴水雲江城橘花發滿道香
氛氲

送鄭少府赴滏陽

子真河朔尉邑里帶清漳春草迎袍色晴花拂綬
香青山入官舍黃鳥度宮牆若到銅臺上應憐魏
寢荒
還高冠潭口留別舍第善為迎門王數熟
作日山有信祗今耕種時遙傳杜陵叟怪我還山
遲獨向潭上釣無人林下棊東溪憶汝處閑臥對
鸕鷀

醴泉東谿送程皓元鏡微入蜀

蜀郡路漫漫梁州過七盤二人來信宿一縣醉衣

冠溪逼春衫冷林交宴席寒西南如噴酒遙向雨
中看

夏初醴泉南樓送太康顏少府

何地堪相餞南樓出萬家可憐高處送遠見故人
車野果新成子庭槐欲作花愛君兄弟好書向穎
中誇

送嚴訢擢第歸蜀

巴江秋月新閣道發征輪戰勝真才子名高動世
人工文能似舅擢第去榮親十月天官待應須早

赴秦

送張直公歸南鄭拜省

夫子思何速世人皆歎奇萬言不加點七步猶嫌

遲對酒落日後還家飛雪時北堂應久待鄉夢促

征期

臨洮泛舟趙仙舟自北庭罷使還京

白髮輪臺使邊功竟不成雲沙萬里地孤負一書

生池上風回舫橋西雨過城醉眠鄉夢罷東望羨

歸程

送周子落第游荆南

足下復不第家貧尋故人且傾湘南酒羞對關西

城山店橘花發江城楓葉新若從巫峽過應見楚

王神

送薛彥偉擢第東都

時輩似君稀青春戰勝歸名登郤詵第身着老萊

衣稱意人皆羨還家馬若飛一枝誰不折棣萼獨

相輝

送張子尉南海

不擇南州尉高堂有老親樓臺重蜃氣邑里雜鮫
人海暗三山雨花明五嶺春此鄉多寶玉慎莫厭
清貧
鳳翔府行軍送程使君赴成州
程侯新出守好日發行軍拜命時人羨能官聖主
聞江樓黑塞兩山郭冷秋雲竹馬諸童子朝朝待
使君

送張升卿宰新淦

官柳葉尚小長安春未濃送君潯陽宰把酒青門

鐘水驛楚雲冷山城江樹重遙知南湖上祇對香
爐峰

送陳子歸陸渾別業

雖不舊相識知君丞相家故園伊川上夜夢方山
花種藥畏春過出關愁路賒青門酒壚別日夢東
城鴉

稠桑驛喜逢嚴河南中丞便別

駟馬映花枝人人夾路窺離心且莫問春草自應
知不謂青雲客猶思紫禁時別君能幾日看取鬢

成絲

送蒲秀才擢第歸蜀

去馬疾如飛看君戰勝歸新登郟詵第更着老萊

衣漢水行人少巴山客舍稀向南風候暖臘月見

春輝

送郭司馬赴伊吾郡請示李明府

安西美少年脫劍卸弓弦不倚將軍勢皆稱司馬

賢秋山城北面古治郡東邊江上舟中月遙思李

郭仙

送滕亢擢第歸蘇州拜親

送爾姑蘇客滄波秋正涼橘懷三箇去桂折一枝

香湖上山當舍天邊水是鄉江村人事少時少捕

魚郎

送任郎中出守明州

罷起郎官草初分刺史符城邊樓枕海郭裏樹侵

湖郡政傍連楚朝恩獨借吳觀濤秋正好莫不上

姑蘇

臨洮客舍留別祁四

無事向邊外至今仍不歸三年絕鄉信六月未春
衣客舍洮水聒孤城胡雁飛心知別君後開口笑
應稀

送弘文李校書往漢南拜親

未識已先聞清辭果出羣如逢禰處士似見鮑參
軍夢暗巴山雨家連漢水雲慈親思愛子幾度泣
霑裙

送李別將攝伊吾令充使赴武威便寄崔

員外

詞賦滿書囊胡爲在戰場行間脫寶劍色裏掛銅
章馬疾飛千里鳧飛向五涼遙知竹林下星使對
星郎

送四鎮薛侍御東歸

相送淚沾衣天涯獨未歸將軍初得罪門客復何
依夢去湖山闊書停隴雁稀園林幸接近一爲到
柴扉

送張都尉東歸

白羽綠弓弦年年只在邊還家劔鋒盡出塞馬蹄

穿逐虜西踰海平胡北到天封侯應不遠燕領豈
徒然

送樊侍御史丹陽便覲

臥病窮巷晚忽驚驄馬來知君京口去借問幾時
回驛舫江風引鄉書海雁催慈親應倍喜愛子在
霜臺

送張卿郎君赴硤石尉

鄉家送愛子愁見灞頭春草羨青袍色花隨黃綬
新縣西函谷路城北大陽津日暮征鞍去東郊一

片塵

送顏少府投鄭州

一尉便垂白數年惟草玄出關策匹馬逆旅聞秋
蟬愛客多酒債罷官無俸錢知君羈思少所適主
人賢

趙少尹南亭送鄭侍御歸東臺

紅亭酒甕香白面繡衣郎砌冷蟲喧座簾疎雨到
牀鐘催離興急絃逐醉歌長關樹應先落隨君滿
路霜

卷下
送許員外江外置常平倉

萬里來又去三湘東復西別多人換鬢行遠馬穿
蹄山驛秋雲冷江帆暮雨低憐君不解說相憶在
書題

入賀
送許員外江外置常平倉

詔置海陵倉朝推畫省郎還家錦服貴出使繡衣
香水驛風催舫江樓月透牀仍懷陸氏橘歸獻老
親嘗

送祕省虞校書赴虞卿丞

花綬傷腰新關東縣欲春殘書厭科斗舊閣別麒
麟虞坂臨官舍條山映吏人看君有知己坦腹向
平津

送江陵泉少府赴任便呈衛荊州

神僊吏姓梅人吏待君來渭北草新出江南花已
開城邊宋玉宅峽口楚王臺不畏無知己荊州甚
愛才

奉送李太保兼御史大夫充渭北節度使

郎太尉光弼弟

詔出未央宮登壇近總戎上公周太保副相漢司
空弓抱關西月旗翻渭北風弟兄皆許國天地荷
成功。

送江陵黎少府

悔繫腰間綬翻爲膝下愁那堪漢水遠更值楚山
秋新橘香官舍征帆拂縣樓王城不敢住豈是愛
荊州

號州送天平何丞入京市馬

關樹晚蒼蒼長安近夕陽回風醒別酒細雨濕行

裝習戰邊塵黑防秋塞草黃知君市駿馬不是學

燕王

送揚州王司

君家舊淮水水上到揚州海樹青官舍江雲黑郡
樓東南隨去鳥人吏待行舟爲報吾兄道如今已

白頭

陝州月城樓送辛判官入奏

送客飛鳥外城頭樓最高樽前遇風雨牕裏動波
濤謁帝向金殿隨身唯寶刀相思灞陵月祇有夢

偏勞帝向金鑪調長望寶衣時思漏刻日亦不
送王七錄事赴號州雨暝風雨暝寒煙郊
早歲郎相知嗟君最後時青雲仍未達白髮欲成
絲小店關門樹長河華岳祠弘農人吏待莫使馬
行遲南顧去鳥人吏待莫使馬行遲
閩鄉送上官秀才歸關西別業
風塵柰汝何終日獨波波親老無官養家貧在外
多醉眠輕白髮春夢渡黃河相去關城近何時更
肯過

送羽林長孫將軍赴歙州

剖竹向江濱能名計日聞隼旗新刺史虎劍舊將
軍驛舫宿湖月州城浸海雲青門酒樓上欲別醉
醺醺

送崔主簿赴夏陽

常愛夏陽縣往年曾再過縣中饒白鳥郭外是黃
河地近行程少家貧酒債多知君新稱意好得柰
春何

送梁判官歸女几舊廬

女几知君憶春雲相逐歸草堂開藥裹苔壁取荷
衣老竹移時小新花舊處飛可憐真傲吏塵事到
山稀

送懷州吳別駕

灞上柳枝黃壚頭酒正香春流飲去馬暮雨濕行
裝驛路通函谷州城接太行覃懷人總喜別駕得
王祥

送人歸江寧

楚客憶鄉信向家湖水長柱愁春草綠去喜桂枝

香海月迎歸楚江雲引到鄉吾兄應借問爲報鬢
毛霜

送襄州任別駕

別乘向襄州蕭條楚地秋江聲官舍裏山色郡城
頭莫羨黃公蓋須乘彥伯舟高陽諸醉客唯見古
時丘

送李司諫歸京

別酒爲誰香春官駁正郎醉經秦樹遠夢怯漢川
長雨過風頭黑雲開日脚黃知君解起草早去入

文昌

送絳州李司馬秩滿歸京因呈李兵部

久客厭江月罷官思早歸
眼看春光老羞見梨花
飛劍北山居小巴南音
信稀因君報兵部愁淚
日沾衣

送崔員外入秦因訪故園

欲謁明光殿先趨建禮門
僊郎去得意亞相正承
恩竹裏巴山道花間漢
水源憑將兩行淚爲訪
邵平園

送柳錄事赴梁州

英椽柳家郎離亭酒甕香
折腰思漢北隨傳過巴
陽江樹連官舍山雲到
臥牀知君歸夢積來去
劍川長

送韋侍御先歸京

聞欲朝龍闕應須拂豸冠
風霜隨馬去炎暑爲君
寒客淚題書落鄉愁對
酒寬先憑報親友後月
客長安

送裴侍御赴歲入京

美他驄馬郎元日謁明光立處聞天語朝回惹御
香臺寒栢樹綠江暖柳條黃惜別津亭暮揮戈憶
魯陽

顏評事入京

顏子人歎屈宦遊今未遲佇聞明主用豈負青雲
姿江柳秋吐葉山花寒滿枝知君客愁處月落巴
川時

送趙侍御歸上都

驄馬五花毛青雲歸處高霜隨驅夏暑風逐振江

濤執簡皆推直勤王豈告勞帝城誰不戀回望動
離騷

武威春暮聞宇文判官西使還已到晉昌

片雨過城頭黃鸝上戍樓塞花飄客淚邊柳挂鄉
愁白髮悲明鏡青春換弊裘君從萬里使聞已到

瓜州

號州南池候嚴中丞不至

池上日相待知君殊未回徒教柳葉長漫使梨花
開駟馬去不見雙魚空往來相思不解說孤負舟

岑嘉州集

卷一

中杯
尋少室張山人聞與偃師周明府同入都
中峰鍊金客昨日遊人間萊縣鳧共去葛陂龍暫
還春雲湊深水秋雨懸空山寂寂青谿上空餘丹
竈閒

歲暮磧外寄元撫

西風傳戍鼓南望見前軍沙磧人愁月山城犬吠
雲別家逢逼歲出塞獨離羣髮到陽關白書今遠
報君

寄宇文判官

西行殊未已東望何時還終日風與雪連天沙復
山二年領公事兩度過陽關相憶不可見別來頭
已斑

郡齋南池招楊麟

郡僻人事少雲山遮眼前偶從池上醉便向舟中
眠與子居最近同官情又偏閒時耐相訪正有牀
頭錢

高官谷口招鄭鄠

岑嘉州集

卷一

三

谷口來相訪空齋不見君
澗花然暮雨潭樹暖春
雲門徑稀人迹簷峰下
鹿羣衣裳與枕席山靄碧
氛氳
夜過盤豆隔河望永樂
寄閨中効齊梁體
盈盈一水隔寂寂二更初
波上思羅襪魚邊憶素
書月如眉已畫雲似鬢
新梳春物知人意桃花咲
索居
西行
寄左省杜拾遺
聯步趨丹陛分曹限紫微
曉隨天仗入暮惹御香

歸白髮悲花落青雲得鳥飛
聖朝無闕事自覺諫
書稀

春興思南山舊廬招柳建正字

終歲不得意春風今復來自憐
蓬鬢改羞見梨花
開西掖誠可戀南山思早回
園廬幸接近相與歸
蒿萊

七月三日在內學見有高近道舉徵宿關

西客舍寄東山巖許二山人

雲送關西雨風傳渭北秋
孤燈然客夢寒杵搗鄉

愁灘上思嚴子山中憶許由蒼生今有望飛詔下
林丘

丘中春臥寄王子良首高岳巖舉海濱
田中開白室林下閉玄關卷跡人方處無心雲自
閒竹深喧暮鳥花缺露春山勝事那能說王孫去
未還

江行夜宿龍吼灘臨眺思峨眉眉隱者兼寄
幕中諸公

官舍臨江口灘聲人慣聞水煙晴吐月山火夜燒

雲且欲尋方士無心戀使君異鄉何可住况復久
離羣

敬酬李判官使院郎事見呈

公府日無事吾徒只是閑草根侵柱礎苔色上門
關飲硯時見鳥卷簾晴對山新詩吟未足昨夜夢
東還

號州酬辛侍御見贈

門柳葉已大春花今復闌鬢毛方二色愁緒日千
端夫子屢新命鄙夫仍舊官相思難見面時展尺

書看十卷餘命猶夫
酬崔十三侍御登玉壘山思故園見寄
玉壘天晴望諸峰盡覺低故園江樹北斜日嶺雲
西曠野看人小長空共鳥齊山高徒仰止不得日
攀躋
公初日奉和杜相公初夏發京城作
按節辭黃閣登壇戀赤墀銜恩期報主授律遠行
師野鵲迎金印郊雲拂畫旗叨陪幕中客敢和出
詩車
谷
士無
山戀
對
故
異
何
可
也
公

漢川山行呈成少尹

西蜀方携手南宮憶比肩平生猶不淺羈旅轉相
憐山店雲迎客江村犬吠船秋來取一醉須待月
光眠

春日醴泉杜明府承恩五品宴席上賦詩

鳧舄舊稱仙鴻私降自天青袍移草色朱綬奪花
然邑裏雷仍震臺中星欲懸吾兄此棲棘因得賀
初筵

陪使君早春東郊遊眺

太守擁朱輪東郊物候新
鶯聲隨坐嘯柳色喚行
春谷口雲迎馬溪邊水照人
郡中叨佐理何幸接
芳塵

雪後與羣公過慈恩寺

乘興忽相招僧房暮與朝
雪融雙樹濕紗闥一塔
燒竹外山低塔藤間院隔橋
歸家如欲懶俗慮向
來銷

與鄆縣郡官泛漢陂

萬頃浸天色千尋窮地根
舟移城入樹岸闊水浮

村閒鷺鷥驚簫管潛蚪傷
酒罇暝來呼小吏列火儼
歸軒

與鄆縣源少府泛漢陂

載酒入天色水涼難醉人
清搖縣郭動碧洗雲山
新吹笛驚白鷺垂竿跳紫鱗
憐君公事後陂上日
娛賓

終南東溪中作

溪水碧於草潺湲花底流
沙平堪濯足石淺不勝
舟洗藥朝與暮釣魚春復秋
興來從所適還欲向

滄洲樂陣與暮齡
與鮮于庶子泛漢江
急管更須吹杯行
莫遣遲酒光紅琥珀
江色碧琉璃
日影浮歸棹
蘆花骨釣絲
山公醉不醉
問取葛疆知
晦日陪侍御泛北池
春池滿復寬
晦節耐邀歡
月帶蝦蟆冷
霜隨獬豸
寒水雲低錦
席岸柳拂金盤
日暮舟中散
都人夾道看

早春陪崔中丞同泛浣花溪宴

旌節臨溪口
寒郊陡覺暄
紅亭移酒席
畫舸逗江村
雲帶歌聲颺
風飄舞袖翻
花間催秉燭
川上欲黃昏

晚過盤石寺禮鄭和尚

暫請尚僧話
來尋野寺孤
岸花藏水碓
谿竹映風爐
頂上巢新鵲
衣中得舊珠
譚禪未得去
輟棹且踟蹰

登涼州尹臺寺

胡地三月半梨花今始開因從老僧飯更上夫人
臺清唱雲不去彈弦風颯來應須一倒載還似山
公回

登總持閣

高閣逼諸天登臨近日邊晴開萬井樹愁看五陵
煙檻外低秦嶺牕中小渭川早知清淨理常願奉
金仙

題金城臨河驛樓

古戍依重險高樓見五涼山根盤驛道河水浸城

墻庭樹巢鸚鵡園花隱麝香忽如江浦上憶作捕
魚郎

郡齋平望江山

水路東連楚人煙北接巴山光圍一郡江月照千
家庭樹純栽橘園畦半種茶夢魂知憶處無夜不
京華

携琴酒尋閣防崇濟寺所居僧院

相訪但尋鍾門寒古殿松彈琴醒暮酒卷幔引諸
峯事愜林中語人幽物外蹤吾廬幸接近茲地興

偏慵

春尋河陽陶處士別業

風暖日暎暎黃鸝飛近村花明潘子縣柳暗陶公
門藥椀搖山影魚竿帶水痕南橋車馬客何事苦
喧喧

題永樂韋少府廳壁

大河南郭外終日氣昏昏白鳥下公府青山當縣
門故人是邑尉過客駐征軒不憚煙波闊思君一
笑言

宿岐州北郭嚴給事別業

郭外山色暝主人林館秋踈鐘入臥內片月到牀
頭遙夜惜已半清言殊未休君雖在青瑣心不忘
滄洲

暮秋會嚴京兆後廳竹齋

京尹小齋寬公庭半藥闌甌香茶色嫩牕冷竹聲
乾盛德中朝貴清風畫省寒能將吏部鏡照取寸
心看

尋楊七郎中宅郎事

萬事信蒼蒼機心久已忘無端來出守不是厭爲
郎雨滴芭蕉赤霜催橘子黃逢君開口笑何處有
他鄉

題新鄉王釜廳壁

隣君守一尉家計復清貧祿米嘗不足俸錢供與
人城頭蘇門樹陌上黎陽塵不是舊相識轂同心
自親

題山寺僧房

牕影搖羣木墻陰載一峯野爐風自爇山碓水能

春勤學翻知誤爲官好欲慵
尚僧暝不見月出但
聞鐘

喜華陰王少府使到南池宴集

有客至鈴下自言身姓梅仙人掌裏使黃帝鼎邊
來竹影拂碁局荷香隨酒杯池前堪醉臥待月未
須回

行軍雪後月夜宴王卿家

子夜雪華餘卿家月影初酒香薰枕席爐氣暖軒
除晚歲宦情薄行軍歡宴疎相逢剩取醉身外盡

空虛
奉陪封大夫九日登高
九日黃花酒登高會昔聞霜威逐亞相殺氣傷中
軍橫笛驚征鴈嬌歌落塞雲邊頭幸無事醉舞荷
吾君
奉陪封大夫宴得征字時封公兼鴻臚卿
西邊虜盡平何處更專征幕下人無事軍中政已
成坐參殊俗語樂襍異方聲醉裏東樓月偏能照
列卿

陪封大夫宴瀚海亭納涼

細管襍青絲千杯倒接離軍中乘興出海上納涼
時日沒鳥飛急山高雲過遲吾從大夫後歸路擁
旌旗

虢州西亭陪端公宴集

紅亭出島外駿馬繫雲端萬嶺牕前睥千家肘底
看開瓶酒色嫩踏地葉聲乾爲逼霜臺使重裘也
覺寒
虢州臥疾喜劉判官相過水亭

臥疾嘗晏起朝來頭未梳見君勝服藥清話病能
除低柳供繫馬小池堪釣魚觀碁不覺暝月出水
亭初

珠亭出梁州陪趙行軍龍岡寺北庭泛舟宴王侍

御州西亭剖謝公宴集

誰宴霜臺使行軍粉署郎唱歌江鳥沒吹笛岸花
香酒影搖新月灘聲聒夕陽江鍾聞已暮歸棹綠
川長

河西春暮憶秦中

渭北春已老河西人未歸邊城細草出客館梨花
飛別後鄉夢數昨來家信稀涼州三月半猶未脫
寒衣

過酒泉憶杜陵別業

昨夜宿祁連今朝過酒泉黃沙西際海白草北連
天愁裏難消日歸期尚隔年陽關萬里夢知處杜
陵田

宿鐵關西館

馬汗踏成泥朝馳幾萬蹄雪中行地角火處宿天

倪塞迴心常怯鄉遙夢亦迷那知故園月也到鐵

關西

早發馬耆懷終南別業

曉笛引鄉淚秋冰鳴馬蹄一身虜雲外萬里胡天
西終日見征戰連年聞鼓鞞故山在何處昨日夢
清溪

登臨洮將赴北庭留別

聞說輪臺路連年見雪飛春風不曾到漢使亦應
稀白草通疎勒青山過武威勤王敢道遠私向夢

中歸

首秋輪臺

異域陰山外孤城雪海邊秋來唯有雁夏盡不聞
蟬雨拂羶牆濕風搖毳幕羶輪臺萬里地無事歷

三年

北庭作

鴈塞通鹽澤龍堆接醋溝孤城天北畔絕域海西
頭秋雪春仍下朝風夜不休可知年四十猶自未
封侯

輪臺郎事

輪臺風物異地是古單于三月無青草千家盡白
榆蕃書文字別胡俗語音殊愁見流沙北天西海
一隅

還東山洛上作

春流急不淺歸棹去何遲愁客葉舟裏夕陽花水
時雲晴開蟬竦棹發起鸕鷀莫道東山遠衡門在
夢思

楊固店

客舍黎葉赤隣家聞搗衣夜來嘗有夢墜淚緣思
歸洛水行欲盡緱山看漸微長安祗千里何事信
音稀

巴南舟中思陸渾別業

瀘水南州遠巴山北客稀嶺雲撩亂起溪鷺等閒
飛鏡裏愁衰鬢舟中換旅衣夢覓知憶處無夜不
先歸

晚發五渡

客厭巴南地鄉隣劔北天江村片雨外野寺夕陽

邊芋葉藏山徑蘆花雜渚田舟行未可住乘月且
須牽

巴南舟中夜書事

渡口欲黃昏歸人爭渡喧近鐘清野寺遠火點江
村見雁思鄉信聞猿積淚痕孤舟萬里夜秋月不
堪論

初授官題高冠草堂

三十始一命宦情都欲闌自憐無舊業不敢耻微
官澗水吞樵路山花醉藥欄祗緣五斗米辜負一

漁竿

題號州西樓

錯料一生事蹉跎今白頭縱橫皆失計妻子也堪
羞明主雖然棄丹心亦未休愁來無去處祗上郡
西樓

省中郎事

華省謬爲郎蹉跎鬢已蒼到來恒襍被隨例且含
香竹影遮牕暗花陰拂簟涼君王新賜筆莫奏向
明光

江上春歎

臘月江上暖南橋新柳枝春風觸處到憶得故園
時終日不如意出門何所之從人覓顏色自笑弱
男兒

初至犍爲作

山色軒檻內灘聲枕席間草生公府靜花落訟庭
閒雲雨連三峽風塵接百蠻到來能幾日不覺鬢
毛斑

成王挽歌

幽山悲舊桂長坂愴餘蘭地底孤燈冷泉中一鏡
寒銘旌門客送騎吹路人看漫作琉璃椀淮王誤
合丹

苗侍中挽歌二首

攝政朝章重持衡國相尊筆端通造化掌內運乾
坤青史遺芳滿黃樞故事存空悲渭橋路誰對漢
皇言

天子悲元老都人惜上公優賢几杖在會葬市朝
空丹旒翻斜日清笳怨暮風平生門下客繼美廟

堂中
天子悲故僕射裴公挽歌三首
盛德資邦傑嘉謨作世程
門瞻駟馬貴時仰八表
名罷市秦人送還鄉絳老迎
莫埋丞相印留着付
玄成
五府瞻高位三台喪大賢
禮容還故絳寵贈冠新
田氣歇汾陰鼎魂歸京兆
天先時劔已歿壠樹久
蒼然
富貴徒言久鄉閭歿後歸
錦衣都未着丹旄忽先

飛哀挽辭秦塞悲笳出帝畿
遙知九原上漸覺弔
人稀

河西太守杜公挽歌四首

蒙叟悲藏壑殷宗惜濟川
長安非舊日京兆是新
阡黃霸官猶屈蒼生望已愆
唯餘卿月在留向杜
陵懸
鼓角城中出墳塋郭外新
雨隨思太守雲從送夫
人蒿里埋雙劔松門閉萬春
回瞻北堂上金印已
生塵

憶昨明光殿新承天子恩剖符移北地受鉞領西
門塞草迎軍幕邊雲拂使軒至今聞隴外戎虜尚
亡竟劫中出世漫澄波闊耿耿大厦深秉心常匪席行義每揮
金汲引窺蘭室招攜入翰林多君有令子猶注世
人心悲

故河南尹岐國公贈工部尚書蘇公挽歌

二首

河尹恩榮舊尚書寵贈新一門傳畫戟幾世駕朱

輪夜色何時曉泉臺不復春唯餘朝服在金印已
生塵

白日扃泉戶青春掩夜臺舊堂階草長空院砌花
開山晚銘旌去郊寒騎吹迴三川難可見應惜庾
公才

韓員外夫人清河縣君崔氏挽歌二首

令德當時重高門舉世推從夫榮已絕封邑寵難
追陌上人皆惜花間鳥亦悲仙郎看隴月猶憶畫
眉時

遠聞傷別劍，忽復歎藏舟。
燈冷泉中夜，衣寒地下秋。
青松弔客淚，丹旆路人愁。
徒有清河在，空悲逝水流。

詠郡齋壁畫片雲

雲片何人畫，塵襟粉色微。
未曾行雨去，不見逐風歸。
只恠偏凝壁，回看欲惹衣。
丹青忽借便，移向帝鄉飛。

臨洮龍興寺玄上人院同詠青木香叢

移根自遠方，種得在僧房。
六月花新吐，三春葉已

長抽莖高錫杖引，影到繩牀只爲能。
除疾傾心向藥王。

使院中新栽栢樹子呈李十五栖筠

愛爾青青色，移根此地來。
不曾臺上種，留向磧中栽。
脆葉欺門柳，狂花笑院梅。
不須愁歲晚，霜露豈能摧。

長門怨

君王嫌妾妬，閉妾向長門。
舞袖垂新寵，愁眉結舊恩。
綠錢生履迹，紅粉濕啼痕。
羞被桃花笑，看春獨

不言

七言律詩

使君席夜送嚴河南赴長水

嬌歌急管雜青絲
銀燭金盃映翠眉
使君地主能相送
河尹天明坐莫辭
春城月出人皆醉
野戍花深馬去遲
寄聲報爾山翁道
今日河南勝昔時

暮春號州東亭送李司馬歸扶風別廬

柳鞦鶯嬌花復殷
紅亭綠酒送君還
到來函谷愁中月
歸去磻溪夢裏山
簾前春色應須惜
世上浮

名好是閒西望鄉園腸欲斷
對君衫袖淚痕斑

九日使君席奉餞衛中丞赴長水

節使橫行西出師
鳴弓擐甲羽林兒
臺上霜風凌草木
軍中殺氣傷旌旗
預知漢將宣威日
正是胡塵欲滅時
爲報使君多泛菊
更將絃管醉東籬

和祠部王員外雪後早朝郎事

長安雪後似春歸
積素凝華連曙暉
色借玉珂迷曉騎
光添銀燭晃朝衣
西山落月臨天仗
北闕晴雲捧禁闈
聞道仙郎歌白雪
由來此曲和人稀

奉和中書賈至舍人早朝大明宮

雞鳴紫陌曙光寒，鶯囀皇州春色闌。
金闕曉鐘開萬戶，玉階仙仗擁千官。
花迎劔珮星初落，柳拂旌旗露未乾。
獨有鳳凰池上客，陽春一曲和皆難。

赴嘉州過城固縣尋永安超禪師房

滿樹枇杷冬着花，老僧相見具袈裟。
漢王城北雪初霽，韓信臺西日欲斜。
門外不須催五馬，林中且聽演三車。
豈料巴川多勝事，爲君書此報京華。

首春渭西郊行呈藍田張二主簿

回風度雨渭城西，細草新花踏作泥。
秦女峰頭雪未盡，胡公陂上日初低。
愁窺白髮羞微祿，悔別青山憶舊溪。
聞道輞川多勝事，玉壺春酒正堪攜。

西掖省郎事

西掖重雲開曙暉，北山疎雨點朝衣。
千門柳色連青鎖，三殿花香入紫微。
平明端笏陪駕列，薄暮垂鞭信馬歸。
官拙自悲頭白盡，不如巖下偃荆扉。

秋夕讀書幽興獻兵部李侍郎

年紀蹉跎四十強，自憐頭白始爲郎。
雨滋苔蘚侵

階綠秋颯梧桐覆井黃驚蟬也解求高樹旅雁還
應厭後行覽卷試穿鄰舍壁明燈何惜借餘光

奉和相公發益昌

相國臨戎別帝京擁麾持節遠橫行朝登劔閣雲
隨馬曉渡巴江雨洗兵山花萬朶迎征蓋川柳千
條拂去旌暫到蜀城應計日須知明主待持衡

五言排律

送嚴黃門拜御史大夫再鎮蜀川兼覲省

授鉞辭金殿承恩戀玉墀登壇漢主用講德蜀人

思副相韓安國黃門向子期刀州重入夢劔閣再
題詞春草連青綬晴花間赤旗山鶯朝送酒江月
夜供詩許國分憂日榮親色養時蒼生望已久來
去不應遲

送郭僕射節制劔南

鐵馬擐紅纓幡旗出禁城明王親授鉞丞相欲專
征玉饌天厨送金杯御酒傾劔門乘嶮過閣道踏
空行山鳥驚吹笛江猿看洗兵曉雲隨去陣夜月
逐行營南仲今時往西戎計日平將心感知已萬

里寄縣旌

送盧郎中除杭州赴任

罷起郎官草初分刺史符海雲迎過楚江月引歸
吳城底濤聲震樓端蜃氣孤千家窺驛舫五馬飲
春湖柳色供詩用鶯聲送酒須知君望鄉處在道
上姑蘇

奉送李賓客荆南迎親

迎親辭望苑恩詔下儲闈昨見雙魚去今看駟馬
歸驛帆湘水闊客舍楚山稀手把黃香扇身披萊

子衣鵲隨金印喜烏傍板輿飛勝作束征賦還家
滿路輝

送嚴維下第還江東

勿歎今不第似君殊未遲且歸滄洲去相送青門
時望鳥指鄉遠問人愁路疑弊裘沾暮雪歸棹帶
流澌嚴子灘復在謝公文可追江臯如有信莫不
寄新詩

六月十三日水亭送華陰王少府還縣

亭晚人將別池涼酒未酣關門勞夕夢仙掌引歸

駿荷葉藏魚艇藤花罨客簪殘雲收夏暑新雨帶
秋嵐失路情無適離懷思不堪賴茲庭戶裏別有
小江潭

餞王荃判官赴襄陽道

故人漢陽使走馬向南荆不厭楚山路祗憐襄水
清津頭習氏宅江上夫人城夜入橘花宿朝穿楓
葉行害群應自懾持法固須平暫得青門醉斜光
速去程

送薛弁歸河東

薛侯故鄉處五老峯西頭歸路秦樹滅到鄉河水
流看君馬首去滿耳蟬聲愁獻賦今未售讀書凡
幾秋應過伯夷廟爲上關城樓樓上能相憶西南
指雍州

送薛播擢第歸河東

歸去新戰勝盛名人共聞鄉連渭川樹家近條山
雲夫子能好學聖朝全用文弟兄負世譽詞賦超
人群雨氣醒別酒城陰低暮曛遙知出關後更有
一終軍

早秋與諸子登虢州西亭觀眺

亭高出鳥外客到與雲齊
樹點千家小天圍萬嶺
低殘虹掛陝北急雨過關西
酒榼綠青壁瓜田傍
綠溪微官何足道愛客且相攜
唯有鄉園處依依
望不迷

佐郡思舊遊

并序

巳亥歲春三月參自補闕轉起居舍人夏四月署
虢州長史適見秋草涼風復來昔桓譚出爲六安
丞常忽忽不樂今知之矣悲州縣瑣屑思掖垣清

閒因呈左右省舊遊

幸得趨紫殿却憶侍丹墀
史筆衆推直諫書人莫
窺平生恒自負垂老此安卑
同類皆先達非才獨
後時庭槐宿鳥亂階草夜蟲悲
白髮今無數青雲
未有期

五言和刑部成員外秋寓直寄臺省知己

列宿光三署仙郎直五宵
時衣天子賜厨膳太官
調長樂鐘應近明光漏不遙
黃門持被覆侍女捧
香燒筆爲題詩點燈緣起草
挑竹喧交砌葉柳鞞

拂牕條粉署榮新命霜臺憶舊寮名香播蘭蕙價
重蘊瓊瑤擊水翻滄海搏風透赤霄微才喜同舍
何幸忽聞韶山腹直玉霄報太天子恩私詔太官
五言絕句
未肯賦寄韓樽

夫子素多疾別來未得書北庭苦寒地體肉今何
如平生坐臥首負每安此安卑同縣者夫對非木
幸得飲尚書念舊垂賜袍衣率題絕句獻上以申
謝因呈感謝

富貴情還在相逢豈間然綿袍更有贈猶荷故人
憐

題井陘雙溪李道士所居
五粒松花酒雙溪道士家唯求縮却地鄉路莫交
賒

題雲際南峰眼上人讀經堂
結宇題三藏焚香老一峰雲間獨坐臥祇是對杉
松

題梁鎰城中高居

居住最高處
千家恒眼前
題詩飲酒後
只對諸峰
眠

耕田殿同郡公題
張處士菜園
坐相
長
澄
沐
耕地桑柘間
地肥菜恒熟
爲問葵藿資
何如廟堂
肉

野寺荒臺晚
寒天古木悲
空階有鳥跡
猶似造書
時

日沒賀延磧
作
然
蘇
呼
夏
育
觀
醉
荷
姑
人

沙上見日出
沙上見日沒
悔向萬里來
功名是何
物

憶長安曲二章寄龐淮

東望望長安
正值日初出
長安不可見
喜見長安

日

長安何處在
只在馬蹄下
明日歸長安
爲君急走

馬

西過渭州見渭水思秦川

渭水東流去
何時到雍州
憑添兩行淚
寄向故園

流

經隴頭分水

隴水何年有潺潺逼路傍東西流不歇曾斷幾人

腸

秋思

那知方歲晚坐見寒葉墮吾不如腐草翻飛作螢

火

行軍九日思長安故園

強欲登高去無人送酒來遙憐故園菊應倚戰場

開

戲題開門

來亦一布衣去亦一布衣羞見關城吏還從舊路

歸

歎白髮

白髮生太速交人不奈何今朝兩鬢上更較數莖

多

滅胡曲

都護新滅胡士馬氣亦麤蕭條虜塵淨突兀天山

孤
題平陽郡汾橋邊柳樹

此地曾居住今來宛似歸
可憐汾上柳相見也依
依

醉裏送裴子赴鎮西

醉後未能別醒時
方送君看君走馬去直上天山
雲

七言絕句

武威送判官赴磧西行軍

火山五月人行少
看君馬上疾如鳥
都護行營太

白西角聲一動胡天曉

號州後亭送李判官使赴晉絳

西原驛路掛城頭
客散紅亭雨未收
君去試看汾
水上白雲猶似漢時秋

五月四日送王少府歸華陰

仙掌分明引馬頭
西看一點是關樓
五日也須應
到舍知君不肯更淹留

原頭送范侍御

百尺原頭酒色殷
路傍驄馬汗班班
別君祇有相思夢
遮莫千山與萬山

送李明府赴睦州便拜覲太夫人
手把銅章望海雲
夫人江上泣羅裙
巖灘一點舟中月
萬里煙波也夢君

號州西山亭子送范端公
百尺紅亭對萬峰
平明相送到齋鐘
驄馬勸君皆卸却
使君家醞舊來濃

奉送曹侍御使江外

新騎驄馬復承恩
使出金陵過海門
荆南渭北難相見
莫惜衫襟着淚痕

崔倉曹席上送殷寅充石相判官赴淮南
清淮無底綠江深
宿處津亭楓樹林
駟馬欲辭丞相府
一尊須盡故人心

送崔子還京

匹馬西從天外歸
揚鞭只共鳥爭飛
送君九月交河北
雪裏題詩淚滿衣

入蒲關先寄秦中故人

秦山數點似青黛渭水一條如白練京師故人不可見寄將兩眼看飛燕

燕支山西過燕支寄杜位
光邊憶君不見令人老

題首蓓峯寄家人

首蓓峯邊逢立春胡蘆河上淚沾巾閨中只是空思想不見沙場愁殺人

玉關寄長安李主簿

東去長安萬里餘故人何惜一行書玉關西望堪腸斷况復明朝是歲除

趙將軍歌

九月天山風似刀城南獵馬縮寒毛將軍縱博場場勝賭得單于貂鼠袍

獻封大夫破播仙凱歌六首

漢將承恩西破戎捷書先奏未央宮天子預開麟閣待祗今誰數貳師功

官軍西出過樓蘭營幕傍臨月窟寒蒲海曉霜凝

李嘉州集 卷一
馬尾葱山夜雪撲旌竿
鳴笳疊鼓擁回軍破國平蕃昔未聞丈夫鵠印搖
邊月大將龍旗掣海雲
日落韓門鼓角鳴千羣面縛出蕃城洗兵魚海雲
迎陣抹馬龍堆月照營

蕃軍遙見漢家營滿谷連山遍哭聲萬箭千刀一
夜殺平明流血浸空城
暮雨旌旗濕未乾胡煙白草日光寒昨夜將軍連
曉戰蕃軍只見馬空鞍

春興戲題贈李侯

黃雀始欲銜花來君家種桃花未開長安二月眼
看盡寄報春風早爲催

草堂村尋羅生不遇

數株溪柳色依依深巷斜陽暮鳥飛門前雪滿無
人迹應是先生出未歸

山房春事二首

風恬日暖蕩春光戲蝶遊蜂亂入房數枝門柳低
衣桁一片山花落筆牀

梁園日暮亂飛鴉極目蕭條三兩家庭樹不知人
死盡春來還發舊時花

酒泉太守席上醉後作

酒泉太守能劔舞高堂置酒夜擊鼓胡笳一曲斷
人腸座上相看淚如雨

題觀樓

荒樓荒井閉空山關令乘雲去不還羽蓋霓旌何
處在空留藥臼向人間

磧中作

走馬西來欲到天辭家見月兩回圓今夜不知何
處宿平沙萬里絕人煙

赴北庭度隴思家

西向輪臺萬里餘也知鄉信日應疎隴山鸚鵡能
言語爲報家人數寄書

逢入京使

故園東望路漫漫雙袖龍鍾淚不乾馬上相逢無
紙筆憑君傳語報平安

醉戲竇子美人

朱唇一點桃花顏宿妝嬌羞偏髻髮細看只似陽
臺女醉着莫許歸巫山

秋夜聞笛

天門街西聞搗帛一夜愁殺湘南客長安城中百
萬家不知何人夜吹笛

胡歌

黑姓蕃王貂鼠裘葡萄宮錦醉纏頭關西老將能
苦戰七十行兵仍未休

戲問花門酒家翁

老人七十仍沽酒千壺百甕花門口道傍榆莢仍
似錢摘來沽酒君肯否

春夢

洞庭昨夜春風起遙憶美人湘江水枕上片時春
夢中行盡江南數千里



長安道南幾十里

國與邠外春風吹
綵舞美人醉
水州土牛耕
黑姓蕃春夢
鼠裘葡萄宮
錦醉纏頭
關西老將能
妙斃辭來古
函豈肯否

去人十十
何志西千
靈百擊
牙門口
豈辭辭
焚以

